

# هر قولاغيمدا بير قيزيل آما

يازار:

رقيه كبرى



نشر اختر

سر شناسه	: کبیری، رقیه، ۱۳۴۱ -
عنوان و نام پدیدآور	: هر قولاغیمدا بیر قیزیل آلما/ یازار رقیه کبیری: ویراستار مرتضی سلمانی.
مشخصات نشر	: تیریز: اختر، ۱۳۹۹.
مشخصات ظاهری	: ۹۶ ص.
شابک	: ۹۷۸-۶۰۰-۴۸۶-۵۳۸-۸
وضعیت فهرست نویسی: فیپا	
یادداشت	: ترکی.
موضوع	: داستان‌های کوتاه ترکی آذربایجانی -- ایران - قرن ۱۴
موضوع	: Short stories, Turkish -- Iran -- 20th century
رده بندی کنگره	: PL۳۱۴
رده بندی دیویی	: ۸۹۴/۳۶۱۳
شماره کتابشناسی ملی	: ۷۵۴۰۷۶۳



## هر قولاغیمدا بیر قیزیل آلما

یازار: رقیه کبیری

ویراستار: مرتضی سلمانی

ناشر: نشر اختر

چاپ اول ۱۴۰۰ ● ۹۶ صفحه ● قطع رقعی ● ۲۰۰ جلد

شابک: ۹۷۸-۶۰۰-۴۸۶-۵۳۸-۸

تیریز- اول خیابان طالقانی، روبروی مصلی، نشر اختر

تلفن: ۰۹۱۴۱۱۶۶۸۹۷ و ۰۴۱-۳۵۵۵۳۹۳

قیمت: ۳۵۰۰۰ تومان

# بِسْمِ الرَّحْمَنِ الرَّحِيمِ

## فهرست

۵	..... امارات چوخ اوزاقدی؟
۱۳	..... ساری خوشختلیییم
۱۹	..... اوزو گونشه
۳۰	..... مرکزده کی بوزارمیش بولود
۳۵	..... کپه نکلری قورخوتمايین!
۳۹	..... دست دیلبر
۴۷	..... لکه
۵۱	..... او قادین دوشیزه اورلئان دئییلدی
۶۱	..... گویرچین قیزلار
۶۹	..... من، کؤلگه م و مهتاب
۷۵	..... بو فالو خاللی صنم
۸۳	..... آما فلسفه سی
۸۷	..... هر قولاغیمدا بیر قیزیل آما



## امارات چوخ اوزاقدی؟

ایل لر سونرا یوسف سکوتو حلقوموندا پوزوب، کندین یوز ایل لیک یولغون<sup>۱</sup> آغاجی نین باشیندان باغیردی: بلقیس سسسسس... سسی ماشین ایچینه اوزاقلشان بلقیسه چاتماسا دا، ماشین آرخاسیندان قاچان یاشیدلاری آیاق ساخالیب، سس صاحبی نین کیم اولدوغونو گورمک اوچون اطرافا باخیب، یولغون آغاجی نین کناریندا دورموش مهربی بی ایله آغاجین باشینداکی یوسفی گورونجه، هئچ بیر سس ائشیتمه میش کیمی یئنه ماشینین بوراخیغی توزاناق آرخاسیندان قاچماغا دوام ائتدیلر. کیمسه یوسفین دانشماغینی خاطرلامیردی. بعضی کندلی لر یوسف یئرینه اونا لالوش دئیردیلر.

مهربی بی بوش کاسا آلینده، آغاجین قیراغیندا دایانمیش اون یاشلی قیزی نی آپاران ماشینین آرخاسینداکی قیرمیزی چیراق لارینا گوز تیکمیشدی. بلقیس یین آدینی ائشیدنده باشینی قالدیرماسا دا، سس دیزلرینی سوستالید، یولغون آغاجی کیمی بئلی بوکولوب، دیزه چؤکنده بوش کاسا آلیندن یئرہ دوشدو.

---

<sup>۱</sup> یولغون آغاجی: سیستان بؤلگه سی نین یئرلی آغاجی دیر. فارسجا: درخت گز.

بیر آن اۇنجه گئری دۇنوش اومودویلا کاسانین سویونو بلقیسی آپاران ماشینین آرخاسیندان سېمیشدی. گون اورتا چاغی همین بو کاسایلا بلقیسین ساجینا-جانینا سو تۇکوب، ألما یاناق لارینی، جانین گۇرونوب گۇرونمهین بوجاق لارینی لیفلهیب، قیزینى عمرونون سونونا کیمی خاطرلاماق اوچون دقت ایله بلقیسه زیلله نیب، اونون صفتینی اُزبرلهیب، دفعه لرجه وجودونو اییله میشدی. بلقیس ایسه قولچاق کیمی نه اینمیشدی، نه دینمیشدی. قیزی نین ساجی، جانى یاد کیشی وئردییی صابین عطرینى قوخویوردو.

یاد کیشی کئش ایله باغلانمیش اسکناس لاری کهور-ون قاباغینا قویوب، بیر دست پالتار، بیر ده او صابینی مهربی بی نین آینه وئریب، بلقیسی یویوندوروب، او پالتاری گئیدیرمه سینی ایسته میشدی.

ماشین گۇزندن ایتندن سونرا یوسف یئنه لال اولوب، خئیلک یولغون آغاجی نین باشیندا دایانیب، بومبوش یولا باخدی. یاشیدلاری قامیشلیغا ساری قاچاندا، قامیش دولو لۇتکه سینی باشینا بوراخدیغینی خاطرلادی. مهربی بی کاسانی کوچه نین توریاغی ایله دولدوروب باشینا سوووردوغونو گۇرونجه، چویوک پیشیک کیمی آغاجدان ائنیب، لۇتکه سینه ساری قاچدی. یاشادیغی کپر<sup>۱</sup> ایله لۇتکه آتاسی بالاچدان میراث قالمیشدی. باجیسی گول پری گندن گونون صاباحیسی کندلی لر بالاچین جسدینی قامیشلیقدا تاپمیشدیلار. یوسف ایسه او گوندن بری لال اولموشدو. بالاچ اولندن سونرا، او لۇتکه نین بدیمن اولدوغو آغیزبا آغیز دولانمیشدی. بدیمن

<sup>۱</sup> کپر: قامیش لا تیکلن کومه.

لۆتكەننن صاحابى دا بديمن اولار دئيه، كيمسه اونا ياخينلاشمازدى.   
 آناسى اونو دوغدوغو گون اولموشدو. آناسى نين اولومونو دوشوننده، اوزو ده   
 بديمن اولدوغونا اينانيردى. اماراتلى ياد كيشى كنده گلن گونەجن باجيسى   
 گولپرى اونو گۆزلەيب، بۇيوتموشدو. كندلى لرين دانىشيق لارينا گۆره بالاچ   
 ياد كيشى وئردىيى اسكناس لارلا آلديغى لۆتكەيه بئله بارماغى   
 توخونماميشدى. كندلى لر هر شئىي اونوتسايدىلار دا، ياد كيشى آپاران   
 قيزلارى هئچ اونوتمازدىلار. قيزلارين آدى، نئچەيه و نئجه گئتديكلىرى   
 آغيزدان-آغيزا دولانيب، سونوندا ناغيل يئرینه سؤيله نيردى. يوسف ايسه   
 آناسى و گولپرى بارهده ناغيل اولان سؤزلىرى ائشىدنده، ايچى ايچىنى   
 يئيردى.

تاي توش لارى اونو گۆرمزدن گلملكلىرى يتترلى دئيلمىش كيمي گاهدان   
 اونو گيرهلهيب، آزارلاييردىلار. بديمن اولماسايدى، بلكه اونو دا اوزلريندن   
 بىرى ساييب، خوسو-خوسو<sup>۱</sup> اويون لارينا قاتاردىلار.   
 ايندىيه كيمي لۆتكەسىنى باشينا بوراخماميشدى. قاميشليغا چاتاندا، اونو   
 بوراخديغى يئرده گۆرونجه راحتلايب، بديمن اولماق دا پيس دئيلمىش   
 دئيه دوشوندو. قاميشلىق و لۆتكەسى اونون چۆرك آغاجى ايدى. بىر مدت   
 ايدى پردهخلك<sup>۲</sup> دوزلدن جان بى بيه ساتديغى قاميش لارلا قارنىنى

<sup>۱</sup> خوسو-خوسو: سيستان بۇلگەسىنده يئنى يئتمە اوغلانلارا مخصوص يئرلى بىر اويوندور. بو اويوندا   
 هر اويونچونون بىر آياغى آكتيودير، او بىرى آياغىنى مخالف آلى ايله ساخلاماليدير، رقيب لر چاليشىلار   
 قارشىداكى اويونچولار آللىرى ايله توندوقلارى آياق لارنى بوراخيپ، اويونو اودوزسونلار.

<sup>۲</sup> پردهخلك: قاميشدان حاضرانمىش پرده. آذربايجان بۇلگەسىنده بو پردهلره «حصير» دئيلير.

دوبوروردو.

بیر آز اؤنجه لؤتکه نی قامیشلیقدان ساحله چيخاردیرکن پکیر ایله بادارین دانیشیق لارینا قولاق مسافری اولموشدو. بادار کاتدانی<sup>۱</sup> اوغلو، پکیر ایسه بلقیسین عمیسی اوغلویدو.

«کهور آتامین یئددی میلیونونو رد ائندی. دئدی اماراتلی یاد آدام اون میلیون وئرن یئرده عاغلیم قاچماییب کی یئددی میلیون آلیب، قیزی می گؤندریم آروادلاریوا قاراواش اولوب، آل آلتیندا ایشله ییب، دایاق یئسین! کهور دئیر امارات چوخ اوزاقدا اولسا دا، آنجاق او یاد آدام قویماز بلقیس دایاق یئیب، آج قالسین. من ده آنام کیمی سئوینیرم کهور آتامین یئددی میلیونونو رد ائله دی.»

«یاد آدام بو گون بلقیسی گؤتورمه یه گلیب. کهور دا یاد کیشی ایله گنده جک زابلدان اؤزونه موتور آلسین. دئیر موتور ایله سرحدده گازوئیل داشییب، ساتاجاق.»

پکیر ایله بادارین سؤزلری پاییز ایلدی ریمی کیمی یوسفین باشیندا شاخمیشدی. قامیش دولو لؤتکه نی قامیشلیقدا باشینا بوراخیب، بلقیسی گؤرمک اوچون کنده ساری قاچمیشدی. اوزاقلاشان ماشینی گؤرورکن یولعون آغاجی نین باشینا دیرماشیب، بئش ایل لیک سکوتونو پوزوب، بلقیسی سسله میشدی.

ایندیسه ماشین آرخاسیندان قاچان یاشیدلاری دا بادار ایله پکیر کیمی پالتارلارینی سویونوب، شورت قاتینا بیرلیکده خوسو-خوسو اوینایرلار.

<sup>۱</sup> کاتدا: کدخدا.



يوسف اونلارين يئره سرهله ديك لرى پالتارلاريندان يان كنجيب، لؤتكه سيني يئنيدين قاميشليغا ايتله ييب، ميداف<sup>۱</sup> گوجو ايله لؤتكه نى سوروب، قاميش لارين اورتاسيندا گؤزه گورونمز بير يئرده داينايب، لؤتكه ايچينده كى قاميش لارين اوزرينده اوزانيب، گؤيه گؤز تيكدى. بعضى واختلار لؤتكه ده اوزانيركن ساحلده اوينايان اوشاق لارين سسنى دينله ييب، آستا-آستا ائشيتديى سؤزلىرى اؤز-اؤزويله تكرر ائديب، اؤز حلقوموندا چيخان سسى دينله يردى. بئش ايل عرضينده بو گونه كيمى اؤزو و قاميش لاردان سونرا كيمسه سسنى ائشيتمه ميشدى. اينديسه خوسو-خوسو اوينايان ياشيدلارينين سس لريني بئله ائشيتمك ايسته مير.

گول پرى گئندن برى هردن بير پرده نين آلتيندان كپرین آستاناسينا بير كاسا ككك زرد<sup>۲</sup> قوبان آلدن سونرا هئچ كيم اونا ياخينلاشماييب. بلقيس ايله قارشىلاشان گونه جن يئمك گتيرن آلين كيمه عايد اولدوغونا كنجكاوليق ائتمه دن هميشه يئمه يى يئيب، آل كاسانى راحتجا گئرى گؤتورسون دئيه، اونو آستانايا قوبوب، شمى<sup>۳</sup> باشينا چكردى. گاهدان باشيني شمى آلتيندا گيزلنديينده بالاچ قارانليقدا گول پرى نين آليندن ياپيشيب، بيرليكه آرخاسيندا قيرمىزى چيراق لارى ايشيلدايان ماشينا سارى گئديب، او ايسه اوغرونجا پرده خلك قيراغيندان اونلارى ايزله ير. سونرا

<sup>۱</sup> ميداف: يئرلى آد. قاميشليق و داباز چاي لار اوچون اؤزل كورك.

<sup>۲</sup> ككك زرد: سيستان بؤلگه سينه عايد بير يئمك. غربى آذربايجان مطبخينده ده ككك زرده اوخشايلان «چوروتمه» آدلى بير يئمك وار. بو يئمه يى سوغان داغ، قورو نانه، جئويز (گيردكان) و قوروت ايله پيشيريب ايچينه چؤرك دوغرايب يئيرلر. چوروتمه اؤزليكله قيش گون لرارينين يئمه يى دير.

<sup>۳</sup> شمى: پتودان نازك، اوست اؤرتمك اوچون اؤزل پارچادير.

بالاچين لال كۆلگهسى گول پرى نين ألينى بوراخيپ، قيرمىزى چىراق لاردان اوزاقلاشيب، كپرین پردهسىنى قالدیریب، ایچرى گیرر. یوسف ایسه بو بالاچدان قورخوب، شمدى قیراغا آتار.

گول پرى نين گۆز بىكلرینی دئیەسن بلقیسین گۆز یوواسیندا اكمیشدیلر. بیرینجى سفر بلقیسین گۆز لرینه باخدیغى گون گول پرىنى خاطرلامیشدی. بلقیس له دانیشماق ایستەسه ده، همیشه کیمی نیطقى قوروموشدو. او گون سحر یوخودان آییلدیغیندا بوش کاسا هله ده كپرین آستاناسیندایدی. بیرینجى سفر ایدی یئمک گتیرن أل، کاسانى گترى قايتارمامیشدی. تعجب ایله بوش کاسایا باخیرکن پرده نین آلتیندان همیشه کی أل دئییل، اؤز آلی بویدا بیر أل آستانایا اوزانمیشدی. جلد یئریندن قالخیب، پرده نی قیراغا چکیب، گول پرى نین گۆز بىكلرینی بلقیسین ایشیلتیلی ماوی گۆز بىكلرینده گۆرموشدو.

گاهدان قامیشلیقدا لؤتکه نین ایچینده اوزانیب گۆیه باخارکن اونا ائله گلیردی کی، شار یئکه لیکده دامجی لار لار گۆی اوزونون ماوی لییندن قوپوب، بلقیسین گۆز یوواسینا سوزولوب. بونونلا بئله گۆی اوزونون ماویلییی بلقیسین بىكلری کیمی ایشیلتیلی دئییلدی. گاهدان گۆیلو ایستە ییردی تانری گۆی اوزونو شار یئکه لیکده بؤلوشدوروب، کندلی لرین گۆز یوواسیندا اکسین. اونلارین هامیسی نین گۆز لری بلقیسین گۆز لری کیمی اولسایدی بلکه قوروموش نیطقى آچیلیب، کندلی لرله دانیشا بیلسه ایدی، داها اونون قارشیسیندا بالاچ و گول پرى دن ناغیل ائتمزدیلر.

قامیشلیق ساحلینده خوسو-خوسو اوینایان یاشیدلارینین سس لرینی

اڻشیتمه سین دئیہ، بارماق لارینی قولاق لارینا تیخیب ماوی گوئیہ گوژ  
تیکیب. داها گوئیو ایسته میر تانری ماوی گوئیو شار ینکه لیکده بؤلوشدوروب،  
کندلی لرین گوژ یوواسینا اُکسین.

بیر آن مهربی بی باشینا تورپاق تۆکن کاسا گوژنون اوْنونه تیکیلدی. او  
کاسایا تای کاسادا کشک زرد یئدی بی دفعه لر سایا گلمز ایدی. اون میلیون  
تومن ایله نئچه کاسا کشک زرد آلماق اولار دئیہ، دوشوندو. اون کاسا؟  
ایبیری کاسا؟ یوز کاسا؟.. اماراتلی یاد آدامین بیر بو قدر پولو وارسا، یقین  
کی، بلقیس اوچون سوزن دوزی پالتارلار ایله تباھگ و تنورچه کیمی دادلی  
یئمکلر ده آلا بیلر. کیشی لرینین بیر بو قدر پولو اولان اماراتین یقین کی،  
زابلدان چوخ اوزاقدا اولمالیدیر. گۆره سن کهور نه زامان زابلدان آلدیغی  
موتور ایله کنده گئری دۆنه جک؟ گۆره سن کندلی لرین گۆزنده، اونون دا  
موتورو بدیمین بیر موتور اولاجاق؟ گۆره سن زابلدان اماراتا نئچه ساعاتلیق  
یولدور؟

بیردن-بیره یاز ایلدیری می کیمی بیر شئی باشیندا چاخدی. تلم تله سیک  
قالخیب، بوتون گوجو ایله میدافی سویون ایچینه باسیب، قامیش لارین  
آراسیندان لؤتکه نی ساحله ساری سوردو.

مهربی بی تورپاقلی ساچ-باشیلا اؤز کپرلری قارشیسیندا دیزلرینی  
قوجا قلایب، بوش کاسایا زیلله نمیشدی. یوسف اونون ساچی نین، اوست-  
باشی نین تورپاغینی تمیزله ییب، سوروشدو: «امارات زابلدان چوخ  
اوزاقدی؟»

مهربی بی اینانماز-اینانماز باشینی قالدیریب، جانیندا بیر گیزیلتی گزدی.

بلقيس ين گۆز بېكلرى يوسفين گۆز يوواسيندان اونا باخيردى. يوسف ايسه دئدى: «اماراتا گئتمه لييم، يولو نشان وئرا!»

ايضاح:

بو حكايه نى حورمتلى صنعتكار، صابر قاضى جناب لارينين «فرزندان فاقد هويت» فتو توپلوسو تاثيرى آلتيندا يازميشام.

## ساری خوشبختلیییم

یئنه بو گون آیین اون اوچونجو گونودور. یئنه تمبری آغزیمین سویویلا ایسلادیب، پاکاتین دالیسیندا سول گوشه یه پایشدیریرام. یئنه تمبرین دالیسینداکی چسبین مور دادی دیلیمه یاییلیر. یئنه ده آلمین دالیسی ایله دیلیمی سیلیرم.

تمبرین اوزرینده سورمئی گئیینمیش بیر بالاجا قیز آیاق پنجه لری اوسته قالخیب، نامه سینی پست صاندیغینا سالماغا چالیشسا دا، بویو چاتمیر. من نسلی قیریلیمیش انسان لار زامانیندان قالدیغیم کیمی، بو اُتک جوراب گئیینمیش بالاجا قیز دا نسلی قیریلیمیش انسان لار زامانیندان کاغیز اوزرینده قورویوب قالیب. بو قیز دا منیم کیمی هر آیین اون اوچونجو گونو تمبر اوزریندن قوپوب، نامه سینی پست ائله مه یه گلسه یدی، قویمازدیم پنجه لری اوسته قالخسین، تلم تله سیک پیلله لردن ائنیب، اونو قوجاغیما آلیب، نامه سینی صاندیغا سالماغا یاردیم ائدردیم.

پیلله لردن آشاغی ائنیب، نامه پاکاتینی صاندیغا سالیب، یئنه یوخاری قالخیرام. منیم اوچون نامه نین مقصدی اؤنم سیزدیر، بیر آی بویو گونده لیسیمین روایتی دیر او نامه لر، هر کیمین آینه چاتیر چاتسین، آنجاق هر

آيين اون اوچونجو گونو پيلله لردن آشاغى ائنيب يوخارى قالخماق، سارى خوشبخت ليبيمين ياريم چرخه سى دير. گونده ليبيم تکرار اولسا بئله، هر آى بو گونده ريش چرخه سىنى تزه له مک منيم اوچون واجب بير عملدير.

هر سحر چاغى کیمی اوزوم ايله ياشيد اولان لهستانى صندليمى آشپاز خانادان گوتوروب، پنجره اؤنونه قويورام. هر انسانين و هر شئيين گونده ليک بير چرخه سى اولدوغو کیمی، بو صندلين ده اؤزونه گوره ديشيلمز بير گونده ليک چرخه سى وار؛ آشپاز خانادان پنجره اؤنونه، پنجره اؤنوندن آشپاز خانايا.

هر گونکو کیمی پرده نى قيراغا چکيرم. خيابان آشاغيدان يوخارى پنجره نين جاميندا جانلانير. ايله شيرم. هر گونکو کیمی صندلين لاخلاميش پايالارى جيرجير جيريلدايير. بير گوزوم جانلى و قالماقلى خياباندا، او بيريسى ايسه پست صانديغينداير. پستچونو گوزله بييرم. گليب صانديغى آچيب، نامه مى آپارسايدى، خوشبخت ليبيمين او بيرى ياريم چرخه سىنى ده تاماملایاردى.

يادىما گلن گوندن برى پست صانديغى بو پنجره نين آلتيندا قويلانيب. دقيق دئسم، داش ماغازالارا بئش آدديم قالميش، هله او زامان بويوم تمبر اوزرينده کى بالاجا قيز بويوندا اولما ميشدى.

پست صانديغيندان بير آز آرالى، صانديق ايله ياشيد اولان آعاج لارين بويو ايکى مرتبه لى ائولردن يوخارى قالخيب، سايسيز-حسابسيز قوش لار بو آعاج لاردا يووا قوروب سونرا كوچوب لر، پست صانديغى ايسه سايسيز-حسابسيز نامه نين سفربرى اولسا دا، بو گونه کیمی نه اوزانيب نه ده قيساليب، آنجاق قويلانديغى يئرده دمير پايا اوزرينده دايانيب. قار، ياغيش،

گونش ساندىغىن اطرافىنداكى آغاچلاردا قول-قانادا، بوى-بوخون وئرنىدە، ساندىغىن سارى رنگىنى بوزاردىم. منجە پىست ساندىغى نىن بوزارمىش رنگى ايله لەستانى صندىلدىم جىرىلداما سىسى نىن اورتاق قايناعى وار. هر دىفە اىلشدىمىدە صندىلدىن قوجالىق ردىفى اوستە كۆكلنىمىش موسىقى سىسى قالخىپ، پردە-پردە پنجرەدن خىابانا سوزولوب، ساندىغىن بوزارمىش رنگىنە توخونور.

ساندىغىن اۋنوندن اۋتوب كىچن انسان لارىن بىر چوخو گۆرر-گۆرمزديرلر. ساندىغا باخىپ يول لارىنا دوام ائتسەلر دە، بو سارى خوشبختلىق اىلدىن وئردىك لرىنى گۆرمورلر. بو انسان لار ساندىغىن نە كارا گلدىيىنى اونودوبلار. گون وار ايدى بو ساندىق اضطراب ايله اۋزلم، عشق ايله اومود، ھوۋوشنە ايله دىنچلىك اىش-وئرىشى نىن واسطەسى اىمىش. منە ائلە گلير كى، تمبر اوزرىندەكى بالاجا قىزىن الى بىر دامازلىق<sup>۱</sup> كىمى او گون لردن بىزە يادگار قالىپ.

جاوانلىغىمدا سىنىق-سالخاق بىر دوچرخە ايله ائولرىن قاباغىندا دايانىپ، نامەنى ائو صاحىبنە وئردىم. گاهدان ائو صاحى نىن خواهشى ايله نامەنى اونا اوخوياردىم. نامە پاكات لارىننىن اىچىندەكى شاخ اسكناس لار، محبتلى سۆزلر، يادگارلىق پىستال كارت لار منى ذوقا گتىرردى. اۋلوم-اىتىم خبرلرى، گىلئىلىك سۆزلرىنى نامەلردن سىلمەيىم گلردى. گاهدان شىلتاقلىغىم توتوب، اۋزلويومدە اوخودوغوم نامەلرە جواب يازاردىم. يازاردىم، سونرا دا پوزاردىم. يئنە دە يازاردىم، يئنە دە پوزاردىم. بىر پىستچو اولاراق ھامىنى

<sup>۱</sup> دامازلىق: نىلىنى تكتىر ائتمك اوچون سىنچلىمىش حيوان (يوغورت ماياسى)، انساندا دا اۋزل نىل.

بزه ييب، اوزو لوت گزن ايينه كيمي ايديم.

هر گون پست سانديغيندان علاوه، تبريزين جانلى بير پارچاسيني ايزله ديبيم  
 پنجره مه جام شهنازنما آديني وئرميشم. جامدان جانلى لارين آيين-  
 باش لارينا، يئريش لرينه، دوروشوق لارينا باخيرام. پست سانديغي  
 ديشيلمه سه ده آيين-باش لار، يئريش لر، دوروشوق لار ديشيلىب. گاهدان  
 خيابانندان اوتوب كئچن جانلى لارى سايرام. سونوندا سايماقدا ناكام قاليب،  
 هئج بير سونوجا چاتميرام. عيني تبريز كيمي، عيني مشروطه كيمي،  
 آزاديستان كيمي، عيني ملي حكومت كيمي، عيني هر آيين اون اوچونجو  
 گونو سارى خوشبخت ليبيمين او بيرى ياريسيني گودن كيمي...

گاهدان پست سانديغي نين يالقيزليغيني سامان ميدانيندا، سيد ابراهيم  
 مقبره سي نين دالى كوچه سينده كي حامبال سكي سينه بنزه ديرم. منجه پست  
 سانديغي، حامبال سكي سي، سيد ابراهيم مقبره سي، هر اوچو ده كئچيجي  
 اولاراق گونده ريليش و آينيش چرخه سي نين واسطه سي ديرلر.

گون وار ايدى حامبال سكي سي بير نئجه دقيقه اولموشسا دا يولدان كئچن  
 حامبالين يوكونون آغيرليغيني آيب، حامبال ايسه نفس درندن سونرا يوكونو  
 بئلينه چاتيب، اونا وئرلين آدرسه سارى يوللاييب، گونده ريليش و آينيش  
 چرخه سينه دوام وئرردى. نئجه كي، بير زامان لار پست سانديغي ساعات لار،  
 گون لر، بلكه هفته لر بويو انسان لارين ذهن لرندن كاغيذا سوزولن  
 حس لريني اوزونده امانت ساخلاييب، سونرا پاكات اوزرينده كي آدرسه  
 چاتاردى. سيد ابراهيم مقبره سي ايسه يئر ايله گوي آراسينداكي گوندريليش  
 و آينيش چرخه سي نين واسطه سيدير. سيد ابراهيم مقبره سي نين ضريحينه  
 سوزولن سوزلر، حس لر، آلكيش لار، قارقيش لار، اوووج ايچينده بوزوشموش



اسکناس لار، یالواریش لار و ... هامیسی دیشیلمز بیر آدرسه، اولو دئیلن بیر وارلیغین آدرسینه گۆندهریلیر. بونونلا بئله، انسان یقینه چاتا بیلیمز گۆندهریش لر او اولو دئیلن وارلیغین مقصدینه چاتیب، جواینی آلا بیله جک یوخسا یوخ!

قهوه ایچمک واختی چاتیب. یئریمدن قالخب آشپازخانایا گئدیرم. بیر پیمانہ تورک قهوه سی قهوه جوشا تۆکوب، بیر فنجان سو آرتیریرام. اوجاغین قیراغیندا دایانیب قهوه نین دمنمه سینی گودورم. بیر بؤلوم آجی شکلات قهوه فنجانیمین نعلکی سینه قویوب، یئنه شهنازنا جامین آرخاسینا دؤنورم. بو جام جانلی رسیم لر چرچیوه سی دیر، هر گون یالقیزلیغیمدان بیر یول چکیر خوشبخت و جانلی خیابانین قالابالیغینا. بو جامدا هر کس اؤزو اؤزونون رسامی دیر، من ایسه بو رسیم لرین تاماشاچیسى.

گاهدان منه ائله گلیر کی، قهوه دمله دییم قیسا زاماندا، جامین آرخاسینا گئری دؤندویومده هر شئی دیشیمیش اولاجاق. آما بو گون ده گئری دؤندویومده، هر شئی یئرلی یئرینده دیر. نه پست صاندیغی یئریندن ترپه نیب، نه ده آج لار. دیشیلن لر آنجاق گلدی-گندر انسان لار ایله ماشین لار دیر لار. بیلیم قهوه دمله دییم زامان پستجو گلیب نامه می کیسه سینه آتیب، نامه لرین مقصدلرینه ساری یوللانیب، یوخسا یوخ. بونونلا بئله قهوه دمله مک ساعاتیم ایله پستجو نامه لری کیسه سینه بیغماق ساعاتی نین اوست-اوسته دوشدویونو دوشونمکدن خوشلانیرام. بلکه ده من اؤزومه سؤیله دییم کیچیک یالان لار ایله دیلخوش اولان قوجا بیر پستجویام.

یئنه صندلیمده آیه شیرم. لهستانی صندلین قوجالیق موسیقی سینه قولاق

أسيركن بيز دوردوموز، پست سانديغي، حامل سگي سي، لهستاني سنديلم، بير ده من، هاميميز بيرليکده قوجاليريق دئي، دوشونورم. آما سيد ابراهيم مقبره سي بيزدن ايره لي دير، قوجالماق اوچون ايل لر، بلکه ده قرن لر فرصتي وار.

ياديما گل مير نئچه دفة سيني ق-سالخاق چرخيمي او حامل سگي سینه داييب، پست خورجونومو سگي نين اوزرينه قويوب، چرخين زنجيريني يترينه ساليب، سونرا سگي نين اوزرينده ايله شيب دينجيمي آلميشام. حامل سگي سي زامانين زوالينا چاتميش بير داها اونا دايانيب، ياشايش يوكومون دينجيني آماق گو يلودن كنجير. دينجيمي آلاندا سونرا گنديب سيد ابراهيم چيمن ليبنده اوتوروب، ايستك لريني، آرزولاريني اولو دئييلن وارليغا پست ائدن لري بير داها ياخيندان گوروب، سونرا دو نوب يئنه لهستاني سنديلمين اوزرينده راحتجا ايله شيب، اونون كوكله ديبي موسيقي رديفينه قولاق آسراق پنجره مين شهنازنا جاميندان جانلي تبريزه باخيب، گونده ليك لريمي يازيب، يئنه هر آيين اون اوچونجو گونو او بالا جا قيز تمبريني نامه پاكاتي نين داليسيندا سول طرفه ياپيشديريب، تمبرين آرخاسيندا كي چسپين مور داديني ديليمدن سيليب، پيلله لردن آشاغي ائيب، ساري خوشبخت ليبيمين ياريم چرخه سيني ياشاماغيم گلير. بونونلا بتله، اوزون زاماندير بو نتيجه يه چاتميشام كي، انسان لارين خوشبختليك چرخه لري گو ي ايله يئر آراسيندا ياغان قار-ياغيش چرخه سينه بنزه مير، انسان لارين خوشبختليك چرخه لري كيمي هميشه ليك دئييل...

## اوزو گونشه

«قیزیم، قوهوم-قونشو ایچینده های دوشوب کی، سن ونگو کو  
یانسیلا بیر سان؟»

منسه قهوه ای پاستل رنگینی میز اوزرینه قویوب، سارینی گوْتوروب، بو گون  
رسم ائتدیییم اون ایکینجی گونه باخانی بویا یارکن دئییرم: «قورخمایین،  
قولا غیمی کسمرم!»

جینه دمیر گورسه دن کیمی، هوْله سک مندن اوزاقلاشیب مبل اوزرینده  
ایله شرکن دئییر: «استغفرالله!»

گوله-گوله دئییرم: «خانیم نفیسی ونگوک هارا، استغفرالله هارا!»  
او ایسه آرتیریر: «دئییرم یانی بیر بئله بیر-بیرینه تای گونه باخان رسمی نه  
کاریوا گله جک؟! بیر آز دا آلما رسم ائله، گیلاس رسم ائله، نه بولوم،  
اطرافیندا بیر بئله جانسیز اشیا وار، اونلاری رسم ائله.»

اؤزلویومده دوشونورم: منیم گونه باخان رسم ائله دیییمدن سنه نه؟ سن نه  
بولوسن گونه باخان یانی نمنه؟ سن آنجاق گونه باخانین جانسیز شکلینی  
گوروسن، من ایسه...

بیر آنلیق بویا ماقدان آل چکیب دئییرم: «سیزجه ذهنیم گونه باخان اسهالا  
گئدیر؟!»

«استغفرالله قيزيم بو نه سۆزدی دئییرسن!»

اونون استغفرالله سؤيله دييي آغزينا باخاندا، بيردن-بیره ذهنيم اوتوز ایل بوندان اوله آتيلير. آذر آیی نین توفه-توفو، ساختا-سازاقلی بیر گون، پژوهش مدرسه سی، علوم درسی، منیم قولاغیم، خانم نفیسی نین آغزی... ایل لر سوره سینده اونون سیر-صیفتی دییشسه ده، استغفرالله دئین آغزی ایله قیطانی دوداق لاری هئج دییشیلمه ییب. اوتوز ایل بوندان اول ده منیم سۆزومو ائشیدندن سونرا هر ایشدن اول استغفرالله دئمیشدی.

«نئجه دی گونه باخان یئرینه قولاق رسم ائله ییم؟»

تعجب ایله دئییر: «قولاق؟»

«منجه سیز مندن داها یاخچی قولاغین آناتومی سینی باشاریرسیز. سیندان، چکیش، لاییرنت، لاییرنتدن آسیلمیش پرده، بئیندن قولغا گلن عصب لر... بیلیرسیز گونه باخانین نمه سی یاخچیدی؟ گونه باخان قولاق کیمی دئییل، نه ساغی وار نه ده سولو»، دئییب گۆزومو گۆزونه تیکیرم. او ایسه آغزینی دولدورور یئنه استغفرالله دئسین، امما «آ» سۆزونده دایانیب دوداق لارینی بیر-بیرینه سیخیب، پۆرتوشور.

پنجره نین پرده سینی قیراغا چکیرم. پنجره آرخاسیندا هاوا ساختا-سازاق اولسا دا، ایشیق بیردن-بیره اوتاغا تۆکولور. اؤزل حیاتیما باش اوزاتدیغی اوچون گۆیلومدن کئچیر اونو ائششک آریسی کیمی سانجیم. سحرده ایندییه کیمی رسم ائله دییم گونه باخان لاری بیره بیر پنجره نین هئره سینه دوزوب، دئییرم: «تصور ائله یین بو گونه باخان لارین یئرینه سول قولاق

گۆرورسوز.»

او ایسه سویوق قانلی اولماغا چالیشارکن جانسیز بیر تبسم دوداغینا قوندوروب دئییر: «قیزیم، سنین بو گونه باخان رسم لرین بیزیم هامیمیزی نگران قویوب آخی!»

اونون سؤزو منی داها آرتیق عصبی لشدیرسه ده، چالیشیرام تیکانی نزاکت ایله باتیریم. منه ائله گلیر کی، خانیم نفیسی بوگون روانشناس، بلکه ده مددکار<sup>۱</sup> رولونا گیریب، معلّمیکدن علاوه آیری قابلیت لرینی منه گوسترتمک ایسته ییر. ایل لر سوره سینده اذربله دییی او یود- نصیحت لری تسبیح دنه لری کیمی ساییر. قیزیم، قدیمدن دئیبلر گنده نین آرخاسیجا باخمازلار... عشق، ناغیل لاردا شیریندی، واقعی حیاتدا زهر-زوقوتوم اولوب آدامین گوّنونه سامان تپر، گونونو قره ائلر... نه زامانا کیمی گوّزون یولدا قالاجاق؟.. کیم نه بولور ایندییه کیمی نئچه صاف-ساده قیزی سنین کیمی آسیلی قویوب... کیم نه بولور ایندی هارالاردا کیم لرینن نه فیسق-فجور ایشله ییر... او دانیشدیقجا، اوتوز ایل بوندان اولکی عیناد آستا-آستا ذهنیمده جوجه ریب، پؤهره وئریر.

«خانیم نفیسی، بیرینجی بو کی، منیم گون لریم ساریدی، قره یوخ، ایکینجیسی، جسارتیمی باغیشلایین، سوروشا بیلرم نییه زیست شناسی یئرینه دانشگاهدا روانشناسی، یا دا مددکارلیق درسی اوخومادیز؟»

نه دئدییمی باشا دوشمه میش کیمی هوروت-هوروت اوزومه باخیر. ذکالی، دوشونجه لی، دو یون اچان صفت لر ایله تانینسا دا، دئیسه سن یاشلان دیقجا ذکا دایره سی ده بئینی کیمی کیچیلیب. اوتوز ایل بوندان اول زیست شناسی

---

<sup>۱</sup> اجتماعی مددکار: انسان لارین سورون لارینی آرادان قالدیرماغا یاردیم ائدن سوسیال ایشچی.

درس وئردییی کلاسیندا دوپونو آچا بیلمه‌ین نفیسی، ایندی منی ألینده آچا بیلن بیر دوپون کیمی حسابلا دیغینا گۆره، بتردن آجیقلا نیرام. یننه ده او آذر آیی نین ساختا-سازاقلی گونو گۆزومون اؤنونه تیکیلیر. آغزیمی دولدورورام دئییم: راهنماییی نین ایکینجی ایلی، علوم درسی، آذر آیی نین توفه-توفو... یادیزا گلیر او زامان کی هله ذکالی و دوپون آچان بیر قادین قیلیغینا گیرمه میشدیز، آز قالدی قولاغیمی قوپاردیب، اووجوما قویاسیز؟ ندنسه اؤزومه حاکم اولوب، بیر سؤز دئمهدن کئچیب گونه باخان رسیم لریمین کناریندا دایانیب، گۆزآلتی اونا باخیرام. قول لاری قولتوغوندا، قیچینی قیچی اوسته آشیریب ایلشدیییندن منه ائله گلیر کی، اؤزلویونده منی اقناع ائتمه‌یی باشاردیغینا اینانیب. اونون اؤزگونلیک فیقورونو پوزماغیم گلیر. ساری پاستل مدادیمی گۆتوروب اونون قارشیسینا گئدیب، دیک-دیک گۆز لرینه زیلله نیرم.

«توتاخ کی ونگوک کیمی قولاغیمی کسدیم، سیزجه قولاغیمی کیمه تحفه وئرمه لییم؟ دئییرم سیرغا کیمی او بیرى قولاغیمدان آسلاسام نئجه‌دی؟»  
 نفیسی اینانماز-اینانماز دلّیه باخان کیمی اوزومه باخیر. من ده اونون باخیشینا کیریخیب، گۆزومو گۆزوندن قاچیردیب، پنجره‌نین کنارینا گئری دؤنوب، یئیندن یاریم قالمیش اون ایکینجی گونه باخانی بویاماغا دوام ائدیرم. هاندان هانا نفیسی اؤزنه گلیب، یومشاق و مهربان لحن ایله دئییر:  
 «قیزیم، بئله گئتسه بیر گون گۆزوووو آچیب گۆره جکسن بیر اؤزون قالیبسان  
 بیر ده اؤزون...»

اونون تکراری سؤز لرینه قولاق وئرمیرم. خبری یوخدور قولاغیمی بوروب

کلاسدا انشیه سالان گوندن بری، عیناد بیر نطفه کیمی بئینیمه دوشدو. یئنه ساری پاستلی اونا ساری توتوب دئییرم: «سیزجه بو پاستل لر قدیم زامانین یاغلی گزلینه بنزه میر؟»

اوتوز ایل بوندان اول کلاسدا کیریین کیمی، کیرییر. خانیم نفیسی قارا تاختانین اوزرینده یاغلی گچ ایله دری هوجئیره لری نین شکلینی رسم ائدیردی. مکعب شکلینده دری هوجئیره سی نین یوخاریسینی دیش-دیش، مکعبین اورتاسیندا ایکی دیشی آیری دیش لردن قیسا رسم ائتدی. آذر منی دوسوکله ییب، پیچیلدادی: «بولوسن او قیسسا دندانله ر نیه بنزیر؟»

باشیمی دفریمدن قالدیریب، دقتله قارا تاختاداکی شکله باخدیم.

«خانیم نفیسی نین قباق دیش لرینه»، دئدیم.

ایکیمیز ده پیچیلدادیق. خانیم نفیسی دؤنوب بیزه باخدی. آذری یوخ، منی یئریمدن قالدیردی: «خانیم قیز! گولمه لی سؤز وار، دی بیز ده گولخ دا...» سوسدوم. آذر پیچیلدادی: «دئنه خانیم باغیشلا!»

منسه یئنه سوسدوم. خانیم نفیسی یئنه گولمه بیمین ندینی سوروشدو. آذر یئنه بؤیرومو دوسوکله ییب پیچیلدادی: «دئنه خانیم باغیشلا!»

دئدیم: «خانیم دوزونو دئییر؟»

خانیم نفیسی باشی نین اشاره سی ایله «هن» دئدی. منسه دئدیم: «سیزین قباخ دیش لرین لاپ ائله تاختادا رسم ائله دیبیز دری سلولونا بنزیر...» قیزلارین هامیسی بیردن-بیره اوجادان گولوشدولر. خانیم نفیسی بیر آن کیریدی. سونرا اوزونون دریسی پورتوشوب دئدی: استغفرالله!

نفيسى هۆووشنه‌لى بير حالدا آيمده ميخ كيمي توتدوغوم سارى پاستل رنگينه دونوخوب، بيلمير نه دئسين! بيردن-بيره اؤزگوونليك فيقورو پوزولوب، قول لاريني قولتوغوندان چكيپ، آياق لاريني ييغيب، مبل اوستونده باغداش قورور. منسه دينمز-دائيشماز نفيسى يه باخيرام.

آذر دئدى: «سَفْتَحَلِيِيِيِيِيِيَسِن؟! دئبيرم دئنه باغيشلا...»

«خانيم قيز! كتاب-دفترى قوى كيفيوه، دور گل تاختا باشينا...»

منسه كتاب، دفتر، خودكارىمى كيفيمه قويدوم. آذر قولومو دومسوكله ييب، يئنه پيچيلدادى: «دئنه خانيم باغيشلا. دئنه غلط ائله ديم، بولمه ديم... دئنه... دئنه...»

اووچومو سيخيپ، آزرين آلى نين اوستونه بير يوموروق ووروب، گئديپ قاراتاخانين كناريندا اوزوم اوشاق لارا دايانديم. اؤزومو تاختا قيراغيندا بير آياقلى دورماغا حاضرلاركن، خانيم نفيسى آيندهكى سارى گچى ميز اوزرينه آتيب، گچلى آلى ايله قولاغيمى بوردو. منسه ديش لريمى بير-بيرينه سيخيپ، ديك-ديك اونون پورتوشموش اوزونه باخديم. آغلاماغيمى گؤزله بيردى. آغلاماغيم گلسه ده، اونون گؤز لرينه باخا-باخا آغلاماديم. سونرا گئديپ توالته دويونجا آغلايا بيلرديم. گؤزومدن بير دامجى ياش گلمه يينجه، قولاغيمى داها بتردن بوردو. اينجيمكدن علاوه قولاغيمين اوستونه داغ سو توكولن كيمي ايدى. او ايسه قولاغيمى بوراخمادان دئدى: «دعا ائله باجين بو مدرسه نين معلم لريندى. اؤزو ده منيم صميمى بولداشيمدى. يوخسا بو دقيقه بير شكايهت يازيب، شوراي دبيرانا امضالاديب، سنى مدرسه دن ائشيبه سالديتديرارديم.»



اؤزوم ده باش تاپمیرام ندن ایچیمده قالمیش اوتوز ایلین آجیغی ایندی اویانیب. نفیسی ائویمه گلیب اؤزل حیاتیما باش اوزاتماسایدی، بلکه عؤمرومون سونونا کیمی او گونو بیر داها خاطرلامایاجاقدیم. اونونلا گؤز-گؤزه باخارکن، اوتوز ایل بوندان اولکی کیمی قولاغیمین قیزیشدیغینی حس ائدیرم. ائیم سول قولاغیما ساری گئدیر.

«خبریز وار ایدی ونگوک سول قولاغینی دسامبر آیی، همان بیزیم آذر آیی کسب؟»

نفیسی یئنه بتردن پؤرتوشور. منیم دیک-دیک باخماغیما آل-آیاغینی ایتیرسه ده، یئنه مهربان لحن ایله دئییر: «اوره بیوه آما، ونگوکو شوخلو قجا دئدیم.» سونرا کیفیندن بیر روزنامه چیخاریب میز اوزرینه قویارکن دئییر: «بوگون قزئتده ونگوک باره سینده اوخودوغوم یازی نمدن سنین بیر بئله گونه باخان رسم ائتمه بیوی یادیم سالدی. دئییرم یانی سن کی رساملیق ائله مزدین! نه اولوب بیردن-بیره رساملیغا دوشگون دوشوب عایله نی نگران قویوسان؟»

اونون یومشاق لحنی آز دا اولسا منی اوتاندیریر. اؤزوم ده بیلیمیم کیمین آجیغینی بئچارا نفیسی دن آچیرام؟ اوتوز ایل بوندان اولین، یوخسا ایندیکی احوالاتیمین؟ نفیسی منیم ایچیمده کی احوالاتیمی هاردان بیلسین؟! اونون نه گناهی وار؟ اؤزوم اؤز احوالاتیمی دوشونمه یین یئرده، او نئجه بیلسین بیر بئله گونه باخان هاردان منیم ذهنیمه دولوب، کاغیدلارا بوشالیر! بونونلا بئله اونو هؤووشنه یه سالاندا ایچیمده عجیبه بیر دینجلیک دویورام.

«خانیم نفیسی، نقاشی کلاسیندا یولداشیم آذرین ده رسم لرینی من رسم

اؤدرديم، آما آذر هميشه ۱۹ آلاردى، منسه ۱۶.»

منيم سؤزومه گولومسه ييب، دئير: «يقين معلّميز چوخ هوشلويدو. ۱۶  
وئرمله ايسيتيرميش سنه توبالاتما وئرسين. تقلب، تقلبدي. فرق ائله مز ۱۰  
سوالين جوابيني تقلب وئرهن، يا دا يولداشيويين يئرینه رسم چکه سن!»

او دانيشاركن يئنه گؤزوم اونون آغزينا ساتاشير.

خانيم نفيسى قولاغيمي بوراخيپ، دئدى: «زنگ وورولانا كيمي گئت دور  
حيطده. دوز ائله كلاسين پنجرهسى قاباغيندا. من ده كلاسدان سنى  
گودورم.»

كلاسين قايسينا سارى گئدركن آدرين سسيني ائشيتتيم: «خانيم اجازه؟  
قويون كوتونو گئيسين، هاوا چوخ ساختادى!»

منسه دا يانماديم. قاينى آچيب كلاسدان چيخديم. آذر آرخامجا قاجيب،  
كوتومو آليمه وئردى: «هئچ اولماسا بونو گئى، ستلجم اولارسان آخى!»

كوتومو كوريدورون اورتاسينا تولازلایيب حيطه چيخيرام. هاوانين ساختاسينا  
اوزومون دريسى بيز-بيز اولور. كلاسين پنجرهسى نين اونونده قالاقلی قارين  
اوزرينده دوروب كلاساي زيلله نيرم. قيزلار بويلا نيب منه باخيرلار. خانيم

نفيسى ايسه درى هوجئيرهسى نين كناريندا بير آيرى هوجئيره رسم  
ائتمكده دير. نه دئديينى ائشيتتيرم. آما هوجئيره نين باشيندان اولدوزا بنز

بير قويروق اوزا نيب. خانيم نفيسى درسى دئمه ميشدن اوزوم اوخوموشام،  
بيليرم او اولدوزا بنز عصب هوجئيرهسى نين شكليدير. آياق بارماق لاريم

سويوقدان كئهييب. پوتون لاريمين ايچينده بارماق لاريمي ترپه ديرم بلکه  
قيزيشين. گئت-گئده آل بارماق لاريم دا اوشويوب، سونرا كئهيير.

کیفیمی قیچ لاریمین آراسینا قویوب، آل لریمی قولتوق لاریمین آلتینا سوخوب، قیزدیریرام. بارماق لاریم ایستی-سویوق اولوب، آجیشیر. آغلاماغیم گلیر. کئشکه خانیم نفیسی «گئت توالنده دور» دئیهدی. هئچ اولماسا اوردا دویونجا آغلا یاردیم. خانیم نفیسی پنجره دن منه اشاره ایله «گل ایچری» دئییر. منسه اؤزومو سایمامازلیغا وورورام. ائویمیزه گئتمه ییم گلیر. آرخامی خانم نفیسی یه چئویریب، بارماق لاریمی هوولاییرام.

نفیسی منیم دیک-دیک باخماغیمدان راحتسیز اولان کیمی دیر، ایلشدییی یئرده قایناشیر، یئنه ایلشمه طرزینی دیشیب، مبلون دسته سینه دیرسکله نیب، دوداغینا قوندارما تبسم قوندورور.

«قیزیم، سن کی اؤزون هنرمندسن. قاباکی کیمی ناغیل یاز. بیر ده کی اگر تفنن اوچون رسیم چکیرسن، هر شئیدن چک. اولماز کی آدام دال بادال گونده ۱۵-۱۰ دنه گونه باخان رسمی چکسین کی!..»

ائله دانیشیر، دئیه سن اوتوز ایلدن سونرا یئنه ده منه مدرسه تکلیفی وئریر. جینیم کلّه مه وورسا دا، ادبلی اولماغا چالیشیرام.

«خانیم نفیسی، ۱۵-۱۰ دنه یوخ، هر گون ۱۲ گونه باخان، نه آز، نه چوخ.»  
نفیسی آوارا-گور منه باخیر. یئریندن قالخیر کی، گتسین. منیم سؤزلریمدن یورولموش کیمیدی. اونا اوره ییم یانسا دا، تیکانی لاپ دیبه جن باتیرماق هوسی بیر آن منی راحت بوراخمیر.

«بیر دقیقه ایله شین. ایندی چالیشارام بیر آیری شئی رسم ائله ییم.»  
او ایسه شوبه هلی منه باخسا دا، آنجاق یئنه ایله شیر. منسه بیر آغ کاغیز

گۆتوروب، قهوه‌ای پاستل له بير مكعب رسم ائديب، ايچينده ميتوكوندری،<sup>۴</sup> توک غده‌لری و اونون کیمی باشقا نارین آیین-اویون رسم ائديب، مکعبین باش طرفینی دیش-دیش رسم ائدیرم. اورتاداکی ایکی دیشی ده او بیر لری بویدا رسم ائديب، اونو بير تابلو کیمی نفیسی‌یه ساری توتورام. بير آن حیاتی‌مدا یاشادیغیم بوتون آجی لاری او رسمه بوشالتدیغیمی دوشونورم. نفیسی جین گۆرموش کیمی یئریندن قالخیب، تله‌سیک پالتونو گئییب، شالینی باشینا سالیب، قاپینی چیریپ، گئدیر.

قاپی چیریپلندا اختیارسیز رسمی یئرہ آتیب، آل لریمی قولاق لاریما قویورام. نفیسی قاپینی چیریپلندا یئنہ قولاق لاریمین اوستونہ داغ سو تۆکولن اولور. ایندییه‌جن کیمسه‌یه نفیسی کیمی تیکان باتیرمامیشدیم. منہ نه گلیب؟! بیرینجی دفعه‌دیر حیاتی‌مدا بئلنجی بیر حس لر یاشاییرام. اؤفکه، آجیق، انتقام و دینجلیک ذهنیمده بیر-بیرینه هؤرولور. دیزلریم ده آل لریم کیمی نارین-نارین تیتره‌ییر. بير آن اوزومه گلیب، نفیسی‌یه باتیردیغیم تیکاندان، پئشمانلیق دویورام. وجودومو بير پارچا لئش کیمی مبل اوزره بوراخارکن، ميز اوزرینده‌کی قزئته گۆزوم ساتاشیر.

قاتلانمیش قزئتین قاتینی آچیرام. صفحه‌نین ساغ گوشه‌سینده ون‌گوک ساری بۆرکونون آلتیندان دومبا گۆزلریله منہ یاناکى باخیر. نه یاخجی کی منیمله گۆز-گۆزه گلیمیر. شکلین آته‌یینده یازیلیمیش یازینی اوخویورام.

۴- میتوکوندری (Mitochondrion): میتوکوندری هوجیره‌ده بير اورگانجیق دیر کی، هوجیره‌نین

نفس آلماسی اونا باغلیدیر.

«وَنگوك ايله پل گوگن<sup>۱</sup> بىر-بىرلرینه يازديغى مکتوبلار اساسيندا، ۱۱۹ ایلدن سونرا معلوم اولوب ونگوکون قولاغینی اؤزو دئیل، بىر داعوادا پل گوگن کسمیشدی.»

تعجبندن آز قالیر گۆزلیم ونگوکون گۆزلینه تاي اولسون. بىر داها يازینی اوخویورام. هئچ زامان دوشونمه میشدیم بىر چوخ حادثه نین آرخاسیندا گۆزه گۆرونمز بىر آیرىسى اولای بیلریمیش، گۆره سن منیم یالنیز بوراخیلماغیمین آرخاسیندا کیم وار ایمیش؟!

سونوندا سئودییم آدم طرفیندن باشینا بوراخیلدیغیمی اؤزومه اعتراف ائده بیلدیم دئییه دوشونورکن روزنامه نین يازیسینی بىر داها اوخویورام. بو سفر اوخودوقجا ذهنیمه عجبیه بىر دینجلیک سوزولور. قولاق لاریمین ایستیسى گئت-گئده آزالیر. پنجره نین هئره سینه دوزولموش گونه باخان رسیم لرینه باخیرام. درى سلولونون رسمى میز قیراغیندا یئره دوشوب. اؤزلویومده دئییرم: بئچارا نفیسی...

اون ایکینجی گونه باخان رسمى نین بویاسی یاریمچلیق قالیب. ایکی هاوالیام. قالمیشام بویاماغا دوام ائدیم یوخسا...

---

<sup>۱</sup> - پل گوگن: ونگوک ايله بىر عصرده ياشايان فرانسه لى رسام.

## مرکزده کی بوزارمیش بولود

آندرومدانین آل چکن گونو یوخدور. آدینی ائشیدیب، اونون باره سینده اوخویاندان بری، بیر آن بئله فیکریمدن چیخمیر. هردن بیر بئینیمین اوست قاتلاریندا بورولغان<sup>۱</sup> کیمی بورولوب، آز قالیر منی اورتاسینا چکسین. بئله نچی واختلار ذهنیمین گوجو چاتمیر اونون چئوره سینده کی زنجیری قیریب، اونو گویدن یئره گتیریم؛ یا دا قالخیب، یئرده نه وارسا، گوئه تیکیب، اونون زنجیرینی قیریم. آن باشی آندرومدانین چئوره سینده دولاشمیش زنجیرین سسینی ائشیدن کیمی اولورام. ائوده، خیاباندا، خانیم لارا حاقسیزلیق اولان هر یئرده، او زنجیر قولاغیمدا سسله نیر. تاکسی دا کناریمدا اوتوران بیر کیشی نین قولو بویرومه سورتوشوب، سس سیزجه قیراغا چکیلیب، کیفیمی اورتایا قویاندا، منه ائله گلیر کی، آندرومدا کیمی زنجیرلنمیشم. حتی بیر گون خیابانین اورتاسیندا، یئل چرقدیمی باشیمدان گوٚتورنده، یولدان کئچن لر دؤٚنوب ترسه-ترسه باخاندا، کناریمدان کئچن بیر خانیم تلم تله سیک مندن اوٚنجه آل اوزالیدیب، چرقدیمی باشیما چکنده، منه ائله گلدی کی، او خانیم آندرومدانین پاسلانمیش زنجیرینه زومباتا چکیب، یاغلا دی.

آندرومدا نہ کابوس کیمی دیر، نہ دە رۇیا. او، قونشو کھکشائین آن گۆزل وارلیغی دیر. بیزییم میفولوژییہ گۆره، او، زنجیرلنمیش بیر قادین سمبولودور، منسه گۆرونمز زنجیرلرین آراسیندا یاشایان سود یولونون عادی بیر قادینی. من آیق لاریملا آدیم آتا بیلیرم، اویسا، آیق لاری دا آل لری کیمی قونشو کھکشائین قایالارینا زنجیرلہ نیب.

اونو یاخیندان گۆرمہ یہ تلہ سیرم. زنجیرلنسه دە، گۆردویوم شکیل لردہ گۆی اوزونون پارلاق بیر وارلیغی کیمی گۆرونور. بو گنجہ جوان منجم لرلہ آیقلاشماغیمین آن بویوک سببی آندرومدانی گۆرمک دیر.

قاش قارالبیدیر. یئرہ باخان یوخدور، جوان منجم لرین هامیسی نین گۆزلری گۆی اوزونہ ساری دیر. بیر نچہ سی تلسکوپ لارین گۆزلوک لریندن گۆیو نشان توتوب، اولدوزلاری سیر ائدیرلر. تلسکوپدان کاسیب اولان منجم لر ایسه، آل لریندہ لیزر، گۆی اوزوندہ کی توپلانمیش اولدوزلاری نشان آلیب، اونلاری بیر-بیرلرینہ گۆستیرلر.

– «باخین! او اوش دَنہ اولدوزو گۆرورسوز بیر خطدہ؟..»

من دە اونلارا قاریشیب، گۆیدہ لیزرین نشان توتدوغو نقطہ یہ زیللہ نیرم. بیر قاریش بویوندا بیر-بیریندن آرالی دوزولموش اولدوزلاری گۆرورم. لیزر اورتاداکی اولدوزدان آشاغی سوزولور. گۆزلریم گۆی اوزونون عقرب بویدا بیر نقطہ سینی فتح ائتدییی اوچون سئوینجک دوشورم. عقربین قویرغونو بئلہ سچہ بیلیرم. بونولا بئلہ، آندرومدا عاغلیمدان چیخمیر. اونو گۆرمہ یہ تلہ سیرم.

– «آندرومدا عَربہ یاخیندی؟»

جوان منجم تبسم ائدیر. بیلیمیرم اونون تبسمو ریشخند معناسیندادیر، یوخسا

بيليم سيزليبيمه مرحمتله ياناشير. گوله-گوله دئير: «يوووو... ايكي كوچه  
عربدن اويانليخدى».

- «گلين باخين! زحلى توتموشام». منى چاغيران منجمه سارى گئديرم.  
بیر نئجه آغ تلسكوپون ايچينده، اونون تلسكوپونون قارا رنگى دقتيمي  
چكير. اوسته ليك اونون تلسكوپونون قوشا گۆزلويو وار. تلسكوپون قوشا  
گۆزلوك لریندن گۆرونن گۆيه باخیرام. پارلاق بیر حالقانی ایچینده کیچیک  
بیر مونجوق گۆرورنور.

- «باخين! سول آلدە کی اولدوز تیتان دی.»

دئيرم: «يونان ميفولوژيسينده، گۆی تانریسی یان یئر تانریسی نین  
اوشاخ لاریدی تیتان لار.»

نه دئدییمی باشا دوشمه میس کیمی، اوزومه باخیب آرتیریر: «دئیرم یانی  
سول آلدە بیر قمر وار، زحلین قمرلریندن بیرى...»

بیر آن بیر جوت آیری قمر ده گلیب، فیکریمی راحت بوراخمایان  
آندرومدانین کنارینا تیکیلیر. بیرینجیسی، قمرالملوک وزیرى. بو قمردن  
گۆروب-گۆره جه بیم یالنیز باشینا نیم تاج قویموش بیر شکیل اولموشدور، بیر  
ده آرا-سیرا ضبط صوت دا قولاق آسدیغیم کاست لره ییغلمیش سسی. یادیم  
گلمیر اونون سرگذشتینی هاردا اوخوموشام؛ آنجاق بو «قمر» ین قمرلیبی  
عۆمرونون سون چاغ لاریندا باشا چاتیب، او ایسه فلاکتده یاشاییب،  
یالقیزلیقدا اؤلوب. ایکینجی قمر ایسه، قاینی وفات ائندن سونرا،  
قاین خاتینی اونون ائوینه گونو گلدی بی گوندن بئله، گونوسونون آزار-  
اذیت لرینی، حیات یولداسی نین وفاسیزلیغینی آلین یازیسی کیمی قبول ائدن  
قاین آنام ایدی. منه ائله گلیر کی، آندرومدا کیمی قوشا قمرلرین ده



چئورەسىندە زنجىرلەر وار ايميش. بىر زامان لار بىرىنجى قمر او زنجىرلىرى قىرا بىلمىشىدى، اما ايكىنجى قمر اۋز زنجىرلىرىنى سىنىنى ائشيتمە يە بئله قادر دئىلمىش. يئنە سوروشورام: «آندرومدانى نەواخ گۆرە بىلەرىخ؟»  
باشقا بىر منجم قوھ چىراغىنى ياندىرىب، آلىندەكى كىتابا باخىر: «شب ۲۵ تىرماھ... آندرومدا گئجە ساعات ايكى دن او يانا ياخچى گۆرۈش.»  
ساعاتىما باخىرام. اون ايكىنى سوووشوب. بىرە بىر شئى قالمىر. منسە ھىچ عقربەلرىن بىر-بىرىنىن اوستوندىن سوپروشدويونو ملتفت اولمامىشام.  
ايكى گۆزلو تلسكوپون صاحى اولان منجم گۆزلۈكلردن باخاراق دانىشىر:  
«شايد آيىن ايشىغى مانع اول... اما توتسام سىزى چاغىرام.»  
يئنە گۆيە گۆز تىكىرم. آى، شيطان شاپالاغى دىر دئىسەن. تۆوەرە<sup>۱</sup> بوى-بوخونويلا گۆيون اورتاسىندا دايانىب. گونشدىن چالېب-چاپدىغى ايشىغى قارالىقدا ائله پاي-بۆلۈش ائله بىر كى، باخان دئىير: «نە گۆيلو-گۆزو توخدى!»

قارالىق گاه اونو بولودلارىن آلتىنا چكىر، گاه دا توتوب، بولودلارىن آلتىندان ائشيبە چىخارىر. آى، كۆكسوز بىر وارلىق اولدوغوندىن غفيل دىر. بلکہ خبرى بوخدور گونشېن آلىن يازىسىنا يازىلىمىش. آى، يئر اوزوندى ھر گون بىر قىلغا گىرىر. بىر گون بىر گۆزلىن قاشىندا اوتوروب، اوركلر دۇيوندورور، او بىرى گون ياي كىمى چكىلىب، باشقالارى توشلادىغى مقصدە اوخلار بوراخىر، بىر آيرى گون آى پارا اولوب، دولت-ملتلىرىن بايراغىندا يئللەنىر. آنجاق دىش دوراسى دئىيل. ساكىن لشمك اونون ذاتىندا بوخدور. اۋزونو

گۆزلره سوخماق اوچون دائم وورنوخور. آی پارا قیلیغیندان چیخیب، تربیع<sup>۱</sup> دونونو گئییر، تربیع دن تثلیته<sup>۲</sup>، تثلیثدن بدر قیلیغینا گیریر. یئردن گۆیه باخان لارین قارشیسیندا، اولمایان شیوه بازلیق لارا آل وورور. بونونلا بئله اون دؤرد گنجه لیبی لاپ زهله می آپاریر. گۆی بوغماسی کیمی قارانلیغین اورتاسیندا دایانیب، اوزونو آندرومدانین اوزونه توتوب، اونون زنجیرلرینی گۆزدن ایتیریر.

– «آندرومدانی توتموشام، گلین باخین»، ایکی گۆزلو تلسکوپون صاحبی دئییر. تلم-تله سیک قارا تلسکوپا ساری قاچیرام. دئییه سن گۆیده زنجیر قیریرلار، یوبانیرسام تاماشانی آلدن وئره جه یم.

گۆزومو تلسکوپون گۆزلوک لرینه تیکیرم. گۆزلویون ایچینده بیر-ایکی پارلاق اولدوزدان باشقا آیری بیر شئی گۆرونمور. دقت ایله باخیرام. نه قدر باخسام دا، زنجیرلنمیش خانیمدان هئچ بیر ایز-توز گۆرونمور.

– «من گۆرمورم آندرومدانی»، دئییرم. منجم تلسکوپون گۆزلویوندن باخیب دئییر: «بودو بوردا با... بیر ده باخساز گۆررسیز. اورتادادی... بولود کیمیدی... لاپ ائله مرکزده.»

بیر دفه ده باخیرام. گۆیون اورتاسیندا رنگی قاچمیش بورولغان بیر بولود گۆرورم. بیر آن باشا دوشورم کی، آندرومدا دئدییین، بیزلرین آل-ایاغینا دولاشمیش گۆرونمز زنجیرلر کیمی دیر، آیدین-آشکار گۆزه گۆرونمز. آندرومدا بوزارمیش بولود پارچاسی دیر بو گئنیش گۆیون قارانلیغیندا...

۳ تربیع: بیر هفته آیین هلال گۆرونوتوسوندن سونرا، آی تربیع حالتینده گۆروشور.

۴ تثلیث: آیین حرکتی سببیدن، گونشدن مسافه سی آرتیب، دؤرده اوچ بؤلومو گونشدن ایشیق آلا.

## كېەنكلىرى قورخوتمايىن!

اۋلوسونو آستاچا يىردن گوٲوروب، ائوه گتيرىم دئيه چۆرك سبدينه قويدوم. ساغ-سولوم، آشاغى-يوخارى ضدشورش پلىسى ايله دولو اولسا دا، اۋلوسونو يىرده بوراخاسى دئىلدىم. اۋزوندىن علاوه، اينجه قانادلارينىن رنگلرينه گوٲره اونون اۋلوسوندىن واز كئچه بىلمزدىم.

هانسى روزگار اونو گتيرىب بورا اتمىشىدى، بللى دئىلدى. پىادا يولوندا كورلار اوچون دوزولموش سارى موزايىك دۆشمه نىن اوزرىنده بۇيرو اوسته دوشموشدو. بونا باخما يارق كورلار رنگىن نه اولدوغوندىن باش تاپمىرلار، رنگ اۋلونو ده دىرى كىمى گوٲزه سوخار. آنجاق رنگلى قانادلارينىن آلتىندان كۆلگه سى موزايىكىن اوستونه سىرلىمىشىدى. قانادلارينىن قرينه قهوه يى خال لارى سارى موزايىك اوستونده او قدر گوٲزل گوٲرونوردو كى، اولده اونون اۋلموش اولدوغونا بر خود اولما دىم. دندىم بلكه بو كپه نك ده تبرىز جماعتى كىمى ضدشورش پلىسى گوٲردوكده چاش-باش دوشوب، سارى موزايىكى گونه باخان ايله دىيشىك توتوب. اۋز فىكرىمه گولمه يىم توتدو، امما گولمه دىم. قورخدوم پلىس لر كىرىخىب، اونلارنىن روبوت كىمى شوشه قالخان لارينىن دالىندا قارد توتدوق لارىنا باخىب، گولمه يى توتان بىر عصيانچى اولدوغومو دوشونسون لر! دوزدو كى، گولوش عصيان آنلامىندا

دئييل، آما هانسی عاغیلى آدام تپه دن دیرناغا سیلاخا بورونموش پلیسین اؤنونده گولر کی، من ده گولوم! هله بیلسه یدیله چؤرک آماق ماھاناسیلا زنبیلی قولوما سالیب، ایکی کند مسافه سینده یول گلمیشم اونلاری یاخیندان تاماشا ائدیم... یوخ!.. الله گؤستمه سین او گونو! من کی بیر کاره دئیلم. ژورنالیستم؟ یوخ! یازیچیام؟ یوخ! ایشچییم؟ یوخ! دانشجویام؟ یوخ!.. بس، دوستاق هارا، من هارا؟!.. ایل لر اؤنجه تقاعد اولموش کارمندی ییریسییم. تاماشادان سونرا آلمدن نه ایش گلر کی؟!

آیاغیم آلتینا باخماسایدیم، قبرستاندا قیبرلری آیاقلایب کئچن کیمی اونو دا آیاقلایب کئچمیشدیم. فیکریم پلیس لرده اولسایدی دا، آنجاق گؤزوم یئرده ایدی. یوخسا اونون اینجه قانادلاری آیاغیم آلتدا اوغولوب، دؤشمه نین اوزرینه یاییلاجاق ایدی. گؤرمک همن دایاندیم. بیلیرم، بو هنگامه ده بیردن-بیره پیادا یولونون اورتاسیندا دایانماق، پلیس لرین دقتینی چکمه میش اولماز. ایسته دیم آییلیب اؤلونو یئردن گؤتوروم، سونرا اؤز-اؤزمه دوشوندوم: یئره آییلسم، پلیس لر کیریخیب، یئردن داش گؤتوردویومو ظن ائدرلر. آما بورا تبریزدی، فلسطین دئییل کی من ده انتفاضه ساواشی اوچون یئردن داش گؤتوروب پلیسه ساری توللاییم. اوسته لیک، مگر پلیس کیمدی کی؟ اونلار دا ائله منیم کیمی آنالارین اوغول لاریدیلهر دا... یقین کی، تقاعد اولموش یاشلی لارلا ایش لری اولماز.

ساغ-سولوما باخدیم. بیر آن نظریمه گلدی ساغ-سولومداکی پلیس لر قالخان لارین دالیسیندا قورویوب قالمیش قورخو شوالیه لریدیلهر. آما بو شوالیه لر قورومامیشدیلهر، دیپ-دیری، جانلی آدام لار ایدیلهر. دایاندىق لاری یئرده قیلمیلهر دیلهر، بیر-بیرلریله دانیشیردیلهر. حتی بیر-ایکیسی دقتله

منى سوزوردو. اونا گۆره احتياط ائله ييب، قفيلدن يئره ايلمه ديم. سارى موزاييك اوسته ديزه چؤكوب، اونلارا باخمادان چؤرك سبديمي قولومدان يئره بوراخديم. كپنه بين اولوسونو آستاجا گؤتوروب، سبدين ايچينده كى سنگكين اوزرينه قويدوم. كپه نك يئنه بؤيرو اوسته دوشوب قالدى. آدام اولسايدى، دئيرديم اوخويوب ائشيتدييم ناغيل لارداكى گؤزل كيمي شيرين يوخويا داليب.

گؤيلوم ايسته بير دئيم بو كپه نك لاپ عشق رنگينده دير. عمرلرينده عاشق اولان لار عشق رنگى نين نه اولدوغونو ياخجى بيلرلر. عشق رنگى هردن اؤزل بير رنگه چالار. قاليب هانسى واختدا، هانسى بير حالدا عشقه ياناشاسان. حتى اؤزونه مخصوص لحنى ده وار بو رنگ لرين. بونولا بئله عشق رنگينده دير دئسم، بيله-بيله اؤزومو سالارام او دويغونون ايچينه. بيليرم خيابان لارين بو وضعيتيله عشق دويغوسو توتماز.

بيرجه عصيانچى دا خياباندا گؤزه گؤرونمور. بونولا بئله پليس لرين گئيينيش لرينى، آل لرينده كى باتوم لارينى، باش لارينداكى دمير بؤرك لرينى گؤرنده، آدامين اوره بينه قورخو دامير. آز قالير آدامين آدى ياديندان چيخسين، هاندا قالسين كى عشقين رنگ لرى. آما منجه اولوم ده عشقين رنگ لريندن بيريسى دير. عشقى چؤرك سبديمه داشيماغا دئييل، ساعات ميدانينى قورخو شواليه لرينين محاصره سينده گؤردوكده قوتومدان قوردوم. بير آن نظريمه گلدى او هوندور بينانين باشينداكى ساعاتين عقربه لرى ده قورخودان دايانيب لار. اؤز-اؤزومه دئديم: قورخونون بالاسى اؤلسون! آما مگر قورخو دا دوغار كى بالاسى اولوب، سونرا دا اؤلسون؟! منجه قورخو دئديين ويروس كيمي دير. دوغماز، بولاشيب، ياييلار. قورخو آدمى آل به آل

اۆلدورمز، آزجا-آزجا، تيكه-تيكه اۆلدورر. دوز دئميش لر، قورخو اۆلومدن پيسدير.

حس ائليرم آن آزی بير-ايكى پليس منى گۆزآلتينا آليب لار. يقين يئردن كپنه يى گۆتورمه ييم دقت لريني چكيب. گۆره سن گۆردولر يئردن گۆتوردويوم شئى آنجاق و آنجاق بير كپه نك اۆلوسويدو؟

چاليشيرام سويوق قانلى گۆرونوم. اۆز-اۆزومه دئيرم: فيكر ائله ائدن دووار چكميش بو پليس لر بولوارلارين كنارينا اكيلميش يام ياشيل شومشاد آچاچ لاريديلار. شومشاد آچاچ لارينين قورخوسو يوخدو كى!

سنگكين اوجوندان بير پارچا قوپاريب آغزىما قويورام. پليس لرى گۆرمزدن كيمي پيادا يولوندان كئچيرم. بير-ايكى آدديم اوزاقلاشماميش اوشاق يانا بير فيكير عاغليما چاتير. گئرى دؤنورم. بوتون شهامتيمي آياق لاريمدا توپلاييرام. فيكيريم اوشاق يانا اولسا دا، بؤيوك بير ساواشا گئدن كيمي حسييم وار. آدديم آتديقچا دئيرم بس ساواش ميدانينا ياخينلاشيرام. ميدانين اورتاسينا توپلانميش پليس لرين قارشيسيندا دايانيرام. پليس لر ايسه تعجبله منه باخيرلار. بيرى آلىنى بئلىنه آپاريب، باتومون دسته ييني سيخير. قورخورام. او باتوم منيم آرتروزلو سوموك لريمين حساييني بير يوللوق چوروده بيلر. اۆزومو سينديرميرام. كپنه يى آستاجا گۆتوروب اوو جومدا اونا گۆستريب، يانيندا دوران پليس ين چيىنينه قويوب، گئرى دؤنورم. قورخورام بير ده دؤنوب باخام. قورخورام او قورخو شواليه سى كپنه يى چيىنيندن يئره آتيب، آياغى ايله اونون ألوان و اينجه قانادلاريني اُزسين... قورخورام...

## دست ديلبر

ئىچە گوندور ساعات ميدانى بيزيم قوروغوموزدادير. قارامتيل پالتار گئىنميش بير قادين هئىچ تلسمه دن پيادا يولوندان خيابانا ادلاييب، آستا آدديم لارلا ميدانا سارى گليير. عموميتله شورش ياتاندان سونرا جماعت خيابان لارى قوروق آلتينا آلميش، شورشه قارشى خدمت آئدن پليس لرى گورمزدن گليب، يا دا گوز اوجو اونلارى سوزوب يول لارينا دوام اندرلر. هم قاتار لاريم كيمي من ده تعجب ايله بيزه ياخينلاشان قادين باخيرام. قادين ايكي آدديم بيزه قالميش قارشيميزدا دايانيركن ساغ طرفيمده كي هم قاتاريم دئيبير: «ائله بير بو قوجا-قارى قالميشدى ايماله ائله مه سين!»

«بوشلا، پاتلتيئيدن بلليدى آلايمرى وار، ائوينين يولونو آزيب، گورموسن گيژ تويوق كيمي والاي وورور!» سول طرفده كي هم قاتاريم دئيبير.

منجه قوجا آدام لارين آستا آدديم لارى حيات تجربه لرinden آسيلي دير. انسان ياشا دولونجا يولون سونونا يئتيشمك اوچون هئىچ تله سمير. قادينين يئريشيدن چوخ، قولوندان آسلانميش حصير زنبيل دقتيمي چكير. ياخينلاشديقجا زنبيلين اوزرينه توخونموش چيچك لر منه تانيش گليير.

ایچیمده عجیبه بیر دوینغو قایناشیر. بو سویوق و قورخولو آتمسفرده او حصیر زنبیل اوزرینده کی چیچک‌لر، اعدام صحنه‌سینده اویونجاغی ایله اویناییب گولومسه‌ین بیر معصوم وارلیغی جانلاندیریر. بیردن-بیره اوزاق بیر خاطره ذهنیمده آیدینلاشیب، او زنبیلین تائیش گلدییی-نین ندنینی خاطرلایبیرکن، ایچیمده منی اینجیدن بیر نیسگیل اویانیر. بیر سفر شمالا گئندنه آنام صیغه باجیسی نین زنبیلینی امانت آلیب منه گؤستریب اونون کیمی بیر چؤرک زنبیلی آماغیمی تاپشیرمیشدی. او زنبیلین ده اوزرینده رنگلی چیچک‌لر توخونموشدو. شمال سفریندن گئری دؤندویومده، آنامین تاپشیریغینی اونوتدوغومو خاطرلایمیشدیم. سونراکی سفرلرده آنام حیاتدا دئییلدی اونون تاپشیریغینی یئرینه گتیریم.

قادین گلیب دوم‌دوز منیم قارشیمدا دایاناندا هوپوخورام. حاضر-یراق اولماق شورشه قارشی خدمت ائدن پلیس اوچون آن واجب آمردیر. بیردن-بیره هووشنه باشیمدان بدنیمه سوزولوب، جانیمی قیزیشما باسیر. ساغ-سولومداکی هم‌قاتارلاریم کیمی آلیمی بئلمدن سالانمیش باتوما آپارماق ایسته‌سم ده، اونون بارماغینداکی دست‌دیلبر اوزویو گؤرونجه ندنسه آلیم سوستالیر. بیلیمرم ایچیمده اویانمیش نیسگیل، یوخسا اونون آستا و اینانجلی آددیم‌لاری آلیمین سوستالدیغینا سبب اولور، آنجاق قادین دیک-دیک گؤزومه گؤز تیکنده هووشنه‌م آرتیر. اولمایا انتحار کمربندی وار، اولمایا بو قادین، زنبیلینده آل بومباسی داشیبیر دئییه دوشوندویومده ثانیه



آخارى زنبىلىن ايچىنە گۆز آتيرام. قاتلانمىش بىر سنگگ گۆردويومده آزجا راحاتلاسام دا، انتحار كمر بندى دوشونجهسى عاغلىمدان چىخمىر.

قادىن آلىنى زنبىل ايچىنە سالىب بىر شئى گۆتوروركن ساغ-سولومداكى هم قاتارلاريم باتوم لارىنى، منسه پلىس قالخانىمى يوخارى قالديرماق ايسته دىيىمىز آن، قادىن اوو جوندانى كپه نه يى ساغيمداكى هم قاتاريمى گۆستىر.

هويوخموش كىمى اونون اوو جوندانى كپه نه يه باخىرىق. قادىن دىنمز-دانىشماز، رتبهسى يوكسلمىش افسرىن پاگون لارىنا اولدوز سانجان بىر ژنرال مثالى كپه نه يى منىم ساغ چىيىنمه قوياندا، يئنه بارماغىنداكى عقىق قاشلى دست دىلبىر اوزويونه گۆزوم ساتاشىر. او ايسه كپه نه يى چىيىنمه قوياندا سونرا گلدىيى كىمى آستا و اينانجلى آددىم لارلا گئرى دؤنوب، پلىس دسته سىندن اوزاقلاشىر.

يانا كى چىيىنمه قويولموش كپه نه يىن قانادلارىندا كى قهوه اى قرينه خال لارا باخىرام. كپه نك ترىنمىر. سولومداكى هم قاتاريم آلزايمر باره سىنده دىل او جو بىر سۆزلر دئسه ده، اونا قولاق آسمىرام. ساغيمداكى هم قاتاريم باتومون او جويلا كپه نه يى چىيىنمىن يئره سالماق ايسته دىيىنمه آلجكلى آلىمى كپه نه يىن اوزرىينه قويوب، اونا مانع اولورام. او ايسه دئىير: «او قادىنى تانىبىر سان؟»

گۆزومو قادىن گئدن پيادا يولا تىكىب، هم قاتاريمىن سوالىنى اوزومدن

سوروشورام: «من او قادينى تانيبيرام؟»

«آدام چيييننده هئش زادين اولوسون داشيماز، اونو ات يئرە.»

دئيرم: «بیر قوجا قادين نيه گرک بئله بير ايش گؤرسون؟»

سولومداكى هم قاتاريم دئير: «سؤز باشى تاپماجا ناغيل دئين سن، شرلوک هولمز فيليم لرينه باخان سن، ايندى تاپماجانين جوايىنى بيزدن سوروشوسان؟»

ساغيمداكى آرتيرير: «نه تاپماجاسى، نه ناغىلى؟ دلى ايدى، بى آزار دلى ايدى. بى آزار دلييه نه سؤز قانديرماق اولار، نه ده قورخوتماق اولار. يولدان بير اتلى كئچدى، قورتولدى، قادينى بوشلا، او اولونو ده چيييندن سال يئرە اُز!»

«دوغوردان سن آلايمره گؤره ده تاپماجا باشاريسان؟»

سولومداكى هم قاتارما جواب وئرميرم. آلايمرى اولان قادين، بلکه ده بى آزار دلى قادين قارامتيل بير نقطه يه دؤنوشوب، محو اولونجا گؤزومله اونو تعقيب ائديرم. قادين اوزاقلاشديقجا، اونون زنبىلى نين چيچىك لریندن يارانميش دويغونون چكىجى ليبي اچيمده آزالديقجا كپه نه يين چكىسى<sup>۱</sup> آرتير. بير آن منه ائله گلير كى، بو جانسيز كپه نك گئت-گئده آغيرلاشيب، چييينى ساغ طرفه آخينديراجاق. اولمايا او قادين جادوگر ايدى! اولمايا بير اولو كپه نك ايله منى سئحيره دى!

<sup>۱</sup> چكى: وزن.

قادین اوزاقلاشدیقجا اولو کپنه بین آغیرلاشدیغینی حس ائدیرم. گؤزومو او محو اولان نقطه دن آیرا بیلیمرم. یئددی ایل بویو خدمت ائتدییم گون لر تقویم صفحه لری کیمی وراقلانیر. بیزه وئر بلمیش أمرلر، قوروق ائتدییمیز میدان لار، خیابان لار، دانشگاه لار، اونوموزدن قاچان آدام لار، یئرہ بیخیلان لار، بیخیلیب قالخان لار، قیشقیریب باغیران لار، قالخان لاریمیزا توخونان داش لار، توستو، قان، سس، سس، سس، سس، سس، سس... عجیبه دوشونجه لر ذهنیمده جوجه ریر.

سس قزئت لرین تیتیرینی اوخویور: أمرلری اطاعت ائدن بیر انسانین چینی اولو بیر کپنه بین آغیرلیغی آلتدا قانقرن اولوب قارالیب، چورودو... اولو بیر کپه نک میتوز بؤلگوسو ایله وظیفه سینی یئرینه یئتیرن بیر انسانین چینی نده یوزلرجه اولو کپنه یه بؤلوندو... قهوه ای قویروقلو ادلی کپه نک انگلی قره داغ اورمانیندا آل توخونمامیش یاریق لارا داراشیب، توخوم سالان کیمی، قهوه ای خالی اولو بیر کپه نک ده صداقت ایله خدمت ائدن بیر آدام چینی نده یوزلرجه اولوم توخومو سالدی...

یالیز ژورنالیست لر دئییل، چینی نده کی اولو کپه نک، شاعر لر، یازیچی لار، سناریو یازان لار و یؤنتمن لر اوچون اورتاق سوژه اولسا دا، آنجاق مؤلف لرین دوشونجه لری اورتاق دئییل. بیر یازیچی چینی مه آغیرلیق ائدن تکجه بیر قهوه ای کپه نه بی مین بیر کپه نه یه دؤنوشدوروب، هر گجه بیر ناغیل سؤیله ین شهرزاد کیمی کاراکتر یاراتماغا چالیشیر. بیر آیریسی چینی نده کی

کپه‌نه‌یی یوزلرجه زنجی کپه‌نه‌یه، منی ده ایپک یولونونون قاچاق یول‌لاریندان زنجی‌لری گتیریب، بغداد بازاریندا قول ساتان بیر آدام کیمی روایت ائتمک ایسته‌ییر.

بیر شاعر کپه‌نه‌یین قانادلارینداکی قرینه خال‌لاری پوزوب، یئرینه قارماقاریشیق، خیردا، بؤیوک رنگارنگ خال‌لار قویور. بیر سناریو یازان منی ده کپه‌نک کیمی اؤلدوروب، یئنیدن لبراتواردا بیزی بیر جوت روبات کیمی یاراتماق قصدی وار و بیر یؤنتمن، من و چینی‌مده کی کپه‌نکدن سندلی فیلم چکمک ایسته‌ییر؛ بو شرط ایله کی، منیم چینی‌م اوجاق، اؤلو کپه‌نک ایسه منیم چینی‌مه دخیل دوشوب، فیلمین سونوندا اؤلو کپه‌نک خورتلاییب، قانادلانیب اوچسون...

موسیقیچی لر ایسه کپه‌نه‌یین قاناد چالماق سسی ایله منیم پوتون لاریمین سسینی نوتا آلیب، اوزرینه شعر قوشوب، موسیقی دستگاه‌لاریندا، فرقلی گوشه‌لرده سس‌لندیرمه‌یه چالیشیرلار.

طبیعت فتوگرافچی‌لاری، انسان فتوگرافچی‌لاری، حشره فتوگرافچی‌لاری، سیاسی فتوگرافچی‌لار و دوربین‌لرین فلاش‌ایشیق‌لاری ... بوتون بونلارا رغمن شورشه قارشى خدمت ائدن پلیس‌لر کیمی نه اعتراض ائتمه‌یه حقیق وار نه سورغو سوال ائتمه‌یه.

رسام‌لارین بییری اؤلو کپه‌نه‌یین قانادلارینی جتته‌گزه‌ن ملک‌لرین قانادلاری ایله دیشدیریب، منی بوینوزلو بیر ابلیس بالاسی کیمی رسم

اٹمکدہ دیر. سالوادور دالی وورغونو اولان بیر رسام ایسه کپهنک لرین نئجه بیر وارلیق اولدوغونو دوشونمہ دن بیزیم یئرلریمیزی دیشدیریب، کپهنه یین بیر آینه باتوم، او بیرى آینه قالخان وئریب، منیم اولومو کپهنه یین ساغ قانادیندا رسم ائتمک ایسته ییر و...

دنگه می ایتیرمیش کیمی یم. گئت-گئده اولو کپهنه یین آغیرلیغیندان چینییم ساغا لنگر سالمیش کیمی اولور.

گۆره سن من بو هنرمندلرین یاراتدیغی نین هانسسیام؟ عاغلیمدان کئچن ژورنالیست لری، موزیسین لری، رسام لاری، فتوگرافچی لاری، شاعرلری و یاریچی لاری منیم کیمی امرلره اطاعت ائدیب، سورغو-سوال حاق لاری اولمایان بیر مقامدا گۆرمک گۆلومدن کئچیر. گۆره سن اونلار بو مقامدا اولسالار، نئجه بیر وارلیغا چئوریلرلر؟

ساغیمداکی هم قاتاریمین باتومو چینیمه توخوندوغو آن دیسکینیرم. کپهنک پوتونلاریمین قاباغیندا یئرہ دوشور. نه ساغ هم قاتاریم باخیرام، نه سول هم قاتاریم. ألجه ییمی آلیمدن چیخاریب کپهنه یین اولوسونو احتیاط ایله اونون آراسینا بوکوب، قولتوق جیبیمه قویورام. کئشیک واختیم باشا چاتانا کیمی گۆزومو قادین گئدن یولا تیکیب، تیکان اوسته آیاق یالین دایانمیش کیمی دایانیب، دست دیلبر اوزوک لری ایله اولو کپهنک لری دوشونورم.

اوه یئتیشمک همین انامدان میراث قالمیش صاندیقچانی آچیرام. انامین

ياقوت قاشلى، فيروزه قاشلى اوزوك لربنين اورتاسينداكى عقيق قاشلى  
دستديلبر اوزويونو گوٲتوروب جولو بارماغيما تاخيپ، كپه نه يى اوزويون  
يئرینه قويورام.

قاديني يئنيدين گوٲرمك اوچون صاباحدان هر گون او گئدن پيادا يولدا  
دايانا جام. بارماغيماكى دستديلبر اوزويومو اونا گوٲستمك ايسته بيرم.

## لکه

أل لريمزده پليس قالخانی، باشيمزدا حربی ديبلقه<sup>۱</sup>، قورويوجو بويونلوق، گؤوده زرهي، ديز قورويوجوسو و بئل لريمزدن ساللانان باتوم لاريميزلا اقتدارلی روبات لشکری کیمی خیابانین اورتاسیندا صف چکیب، فرماندهین امرینی گؤزله بیریک. یوموروق لارینی بیزه ساری توتوب، آغیزلارینی گؤیه آچیب، باغیریب، شعار وئرن جمعیت ایسه قارشیمیزدا دایانیب. جمعیته باخیرکن ديبلقه نین اوزقورويوجو<sup>۲</sup> تلقی نین اوزررینده نقطه بویدا بیر قیرمیزی لکه گؤزومه ساتاشیب، فیکریمی قاریشدیریر. اؤزومو گؤرمه مزلییه وورسام دا، نقطه گؤزومه سوخولور. چوخ یوکسک سوبه ده حاضرلیق امری آلدیغیمیز اوچون دقتیم پوزولمامالیدیر. آما او قیرمیزی نقطه لیزر ایشغی کیمی بئینیمین ایچینه نفوذ ائدیر. ألجکلی بارماغیم ایله نقطه نی سیلمه یه چالیشیرام. سیلینمیر. ذهنیمی نقطه دن یابیندیریم دئییه قارشیمیزداکی شعار وئرن جمعیتین یوموروق لارینا دقت وئیریم. هر آدامین اورهی یوموروغو بویدادیر دئییرلر. یوموروق لاری ساییرام. بیر، ایکی، اون، اون بئش، یوز،

---

<sup>۱</sup> ديبلقه: ضد شورش پليس لره مخصوص طلقدن اوز قورويوجو صفحه سی اولان ديبلقه (عسگر

بؤرکو).

<sup>۲</sup> اوزقورويوجو: محافظ.

ايكى يوز...بو قدر يوموروغو سايماق ممكن دئييل. گۆز قاباغيندا گۆرونن يوموروق لارين بوى بوخونونا باخيب، اوركلرين اندازه سيني اؤز يانيمدا تخمين وورورام. اينجه يوموروق لار، اينجه اوركلر، كوبود يوموروق لار، كوبود اوركلر...

اؤز آل لريم ايله هم قاطار لاريمين آل لرينه باخيرام، هاميميز آل لريميزى قارا آلجكلرين ايچينده قوروماغا چاليشساق دا، اوركلريميزى ايكى قات قوروماغا چاليشيريق. بيز اوركلريميزى گۆوده زرهى ايله پليس قالدخانى آرخاسيندا گيزلى توتوشوق.

آلجك سيز يوموروق لار، آلجكلى يوموروق لار، رنگ به رنگ يوموروق لار هاوادا اويناير... ياشيل يوموروق لار، قارا يوموروق لار، سارى يوموروق لار، قهوه اى يوموروق لار، بنؤوشه اى يوموروق لار، ماوى يوموروق لار و بير قيرمىزى يوموروق...

طلق آرخاسيندان قيرمىزى يوموروغا باخيرام. حربى ديبلقه نين طلقى آرخاسيندان باخماق، پنجره دن باخماق كيمى دئييل، پنجره انسان وجودوندا ن آيرى اولدوغونا گۆره، باخيب قيراغا چكيليپ، گۆرون تولرين تاثيريندن قاچماق اولاييلر، آما حربى ديبلقه باشا قويدولدوغو آن، باش صاحى ايله بيرلشيب، باش صاحينه اقتدار باغيشلايب اونو گوجلو و آل چاتيلماز گؤستيرير.

طلق اوزريندن بئنيمه سيزان قيرمىزى نقطه يه فيكير وئرمه ييم دئيه قارشيمىزدا قيميلدايان جمعيته باخيركن اؤز-اؤزومه دوشونورم: گۆره سن وجودوموزا گئيدىييمىز بو قورويوجو ابزار لار گوجلودور، يوخسا هاوادا اوينايان



بو يوموروق لار و يوموروق بويدا اوركلر؟!

قيرمیزی يوموروق بئینیمه میخلانیب، گۆزومو اوندان آیرماغا قادر دئییلیم. جمعیت شعار وئریب، باغیریرکن بیزه ساری هجوم گتیریر. قیرمیزی یوموروغون حرکتینی گۆزومله دولانديريرام. باخدیقجا قیرمیزی نقطه نین شعاعسی طلق اوزرینده گئیشله نیر. داها دۆزه بیلمه ییب، دیبلقه نین طلقینی یوخاری چکیرم. قیرمیزی یوموروق ایله آرامداکی لکه لی پنجره یوخا چیخیب، هر شئی گۆز اؤنومه آیدینلاشیر. من او قیرمیزی یوموروغو تانییرام. او یوموروق منیم اوره بیمدیر، منیم دۆشومون آلتیندا دۆیونور. من او قیرمیزی یوموروغون کیمه عاید اولدوغونو بیلیرم.

یوموروق لارین سایسی چوخالیب، سس لر ایسه گئت-گئده ایتیله شسه ده، من هؤووشنه ایله یالنیز او قیرمیزی یوموروغو گۆزومله تعقیب ائدیرم. بیزیم ابارلاریمیزین گوجو قارشیمیزداکی جمعیتین جانینا قورخو سالان کیمی بیرلیکده باغیران سس لر ایله یوموروق لار، اؤزلیکله او قیرمیزی یوموروق دا منیم جانیم خوف سالیر.

فرمانده دیبلقه مین طلقینه اشاره ائدیر. «فرماندهین امری دمیری کسر» سؤزو، منیم و هم قاطارلاریمین قولاغینا سیرغا کیمی آسلیب. آن یاخجی پلیس آمرلره اطاعت ائدن پلیس دیر. من و هم قاطارلاریم اوزوموزو ده اورکلریمیز کیمی قورومالییق. طلقی اوزومه سالیرام. قیرمیزی یوموروق ایله منیم آرامداکی آیدینلیق کاسلاشیر. هؤووشنه م گئت-گئده آرتیر.

فرمانده هجوم امری وئیریر. داها بیزیم یوموروق لاریمیز اورکلریمیز بویدا دئییل. هم قاطارلاریمین باتوم لاری هاوایا قالخیب ائیریر. من ایسه یالنیز او

قىرمىزى يوموروغا سارى قاچيرام. اونو قورومالييام. جمعيتين سسى ايله گولله سسى بير-بيرينه قارشير. جمعيت گوج لرېنى آياق لارينا وئريب، قاچيرلار. قىرمىزى يوموروق ايسه گؤزومدن ايتير. او قىرمىزى من او قىزىن بارماق لارينا تاخميشام. من او بارماق لارېن بيرينه بير حالقا سالميشام. من او بارماق لارى دفعه لرحه بيره بير اوئوموشم، من او قىرمىزى يوموروغو، او قىرمىزى اوره يى باتوم لاردان قورومالييام.

قارشىمىزدان قاچان جمعيتين آل لرى آراسيندا يالنىز بير قىرمىزى نقطه آختاريرام. بير آن يئنه قىرمىزى نقطه ميخ كيمي گؤزومه باتيب سونرا نقطه نين نظمى پوزولوب، ديبلقهنين طلقى اوزرينه قىرمىزى جوهر سپيلير دئيه سن.

جمعيتى ايتله ييب، آسفالت اوزره دوشن قىرمىزى آلجكلى قىزى باغريما باسيب، حربى پليس قارشىسىندان قاچان جمعيتين آياق لاريندان و هم قاتار لاريمدان قوروماغا چاليشيرام. قىرمىزى نقطه لر يالنىز آسفالتى لكه له مير. منيم قارا آلجك لريم، اوره ييمى آرخاسيندا گيزلتيدييم گؤوده زرهيم ده، ديز قورويوجوم دا لكه نيب. گئت-گئده لكه نين شعاعسى آسفالت اوزره بؤيويور...

## او قادين دوشيزه اورلئان دئيلدى

اوج گوندور شيلر دره سينده يئر ديشيريك. ساواشماغا دئيل، آراشديرماغا گلميشيك. بيز ايشيميزى باشا چاتديريپ، قايداندان سونرا، آلدە اتدويميز بيلگى لر اساسيندا عسگرلر شيلر دره سينه ساواشماغا، قيرقن سالماغا گله جكلر. آراشديرما واحدينه امر وئريليب اولوم ايله گۆز-گۆزه گلمه يينجه بير گولله ده اتيلماسين.

اوج گوندور بير نفس جيغالا، بير قورتوم ايستى چايا حسرت قالميشيق. پيشيك كيمي يئريبيريك، تولكو كيمي گۆزدن گيزله نيريك. گئجه لر ايسه بايقوش كيمي گۆزو آچيق يوخو گۆروروك. طاهرين آلينده كى دوربونون لنزى يالنيز گئجه لر قاپاق اوزو گۆرور. اوج گوندور شافاق آچيلاندان گونش باتينجا دوربون دره نين بوتون گيريش-چيخيش يول لارينى، اتنيس-يوققوش لارينى، دالدا-بوجاق جيغيرلارينى، دره-تپه نين شكيل لارينى ثبت ائدير.

قاش قارالماقدادير. يئنه قارائليق آستا-آستا شيلر دره سينه چؤكور. بو گئجه نى تيكانليقدا پوسقو قورماليسيقي. اوچ گوندور پوتون لاريميزى آياق لاريميزدان چيخارماميشيقي. طاهر دئير: «آياق لاريم نفس آيب، سو گورسه يدى اولمزديم.» گوله-گوله پيجيلدايرام: «شيلرين دوشيزه اورلئانى<sup>۱</sup> بوردا اولسايدى، جوراب لاريميزين اييسيندن هوشدان گئردى.»

طاهر دئير: «هانى بيزده او شانس؟!»

دئيرم: «نه شانسى؟ اود ايچينده يانيب كول اولان گؤزل ده اولدو شانس؟! بئلنچى گؤزل آدامين نه كارينا گله جك؟»

طاهر دئير: «ائله بيل اوچ گون دئيل، مين ايلدى كبريتين گوگورد اييسينه حسرت قالميشام.»

سول بؤيرومده اوزانميش ژيوان بيزيم دانشيغيميزا قولاق ياتيرديب. ژيوان دئديين، گؤز-قولاغين مصداقى دير. گؤزلرى قيرقى گؤزو، قولاق لارى ايسه سيچان قولاغى كيمي دير. بيزيم ديليميزى اوژل لهجه سى ايله دانيشاندا، نظريمه گلير حرف لرين سسى ديل-دوداغينا توخونماميش، مستقيم خيرخيراسيندان هاوايا بوراخيلير.

«شيلرين دوشيزه اورلئانى كيمدى?!»

ژيوان بيزيم واحدين بلدچيسى دير. بو يولدان عايله سينين قارننى دويورور.

<sup>۱</sup> دوشيزه اورلئان: آلمانلى درام يازارى «فردريش شيلر» ين درام اثرى. حرامى لر (راهزنان) اونون بير

اؤز دیل لرینده اونون کیمی آدم لارا جاش عنوانی وئریلیب. ایلانین یاریبزدان زهلهسی گئدن کیمی، ژیوانین دا جاش عنوانیندان زهلهسی گئدیر. هئج بیریمیزین جرأتی یوخدور اونون یانیندا جاش سؤزونو دیلیمیزه گتیرک. اوشاقلیغی شیلر دره سینده سوووشوب. دره نی آیینین ایچی کیمی تانییر.

دئدیم: «سن تانیمازان. بو شیلر سن دوشوندیون شیلر دئیل.»  
طاھر دئدی: «جیغالاسیزلیقدان، چای سیزلیقدان سنین باشیوا هاوا گلیب. آخی ایتین قودوران یئرینده دوشیزه اورلئانین نه ایشی وار؟! منجه بو دره «شیلر»ین حرامی لرینین یاتاق یئریسیدی.»

«سنجه شیلر دره سینین حرامی لری کیمدی، بیزیم آراشدیرما واحدیمیز یوخسا ایز-توزلارینی آختاریب، یئر-یوردلاریندان شکیل چکدیییمیز آدم لاردی؟»

طاھر سؤزومو ائشیتمه میش کیمی بیر نقطه یه زیلله نیب، سوسدو.  
«دوشیزه اورلئان» درامینی دا «شیلر»ین «حرامی لر» درامی کیمی «او» بیزه تانیتدیریب. «او» درام اوخویاندا عینی زاماندا نئچه شخصیتین جلدینه گیرردی. گئجه-گوندوزو تئاتر صحنه لرینده کئچردی. دوشیزه اورلئان درامینی بیزه اوخویاندا گاه ژاندارک قیلیغینا گیریپ، اینجه سس ایله آیینی بیزه ساری توتوب دئیردی: «سلطان لار، شاهزادالار، آماندیر، ایکی تیره لیک سالماین!» گاه کنت دونوا قیلیغینا گیریپ دوغما بم سس ایله اونون

سۆزلىرى ديليندن سوزردى: «آه...فرانسه نين احوالينا قان آلماغيم گلير...»  
 طاهر ايله من ائله درامين بحرینه گئديرديک کی، آز قالاردی کنت  
 دونونين يئرینه بيز قان آغلاياق. ژاندارکی يانديراندا «او»نون آغزيندان  
 چيخان سۆزلر، شعله لرین ايستيسيني بيزه حس ائتديريب، توستونون اييسي  
 بورنوموزا دولاردی. او آنادان دوغما بير درام اويونچوسو ایدی. دونيانين  
 شاهکار رمان لارینی، درام لارینی بيزه تانيتديريب، دانشگاهدا ادبيات  
 اوخوماغيميزين ماراغيني بيزده يارادان، «او» اولدو.»

آتام دئدی: «خالخين دا اوغلو وار، منيم ده. اوچ اوغلودان بيری توره لی بير  
 آدام اولمادی. قادام گلسين دانشگاها. «او» دانشگاها گئدی نه اولدو؟  
 اوزونه گون آغلامادی کی هئچ، باشيمي دا يئر تیکدی. گئديب تاماشالاردا  
 موطروف لره قاريشيب، اونون-بونون قلیغينا گيردی. سيز ده اونون فعلينه  
 اويوب، دانشگاه-دانشگاه دئمه بين، دانشگاهی بوشلايين. گلین اؤز يانيمدا  
 بازارين جيک-بؤرکونو اؤيره نين بلکه اوزوزه بير آدام اولاسيز.»

آتامين مخالفت لرینه باخما ياراتق طاهر ايله من، هر ايکيميز ده کنکوردا قبول  
 اولوب، «او»نون يارديمی ايله آتامدان گيزلين ادبيات فاکولته سينده درس  
 اوخوماغا باشلاديق. «او» اورتادان يوخ اولاندان سونرا ایدی کی، آتام اکيز  
 اوغلان لارينين ادبيات اوخودوغوندان خبردار اولدو.

آتامين تاخما ديش لری آغزيندا شيققيلدايا-شيققيلدايا دئدی: «تاماشالاردا  
 تلخک کیمی اونون-بونون قلیغينا گيرمه یی بس دئيلدی، ايندی ده

دین سیزلره قاریشیب، چیینینه توفنگ آتیب، حرامی لر کیمی داغ-داشدا سورونور. بئله اوغولون اولماماگی اولماغیندان یئی دی. بازاردا باشیمی دیک توتانمیرام. بو دقیقه دن بویانا دانشگاه بی دانشگاه. والسلام، شد تمام!«  
اونسوز دا فرهنگی انقلاب اوزوندن دانشگاه لارین قاییسی اوزوموزه باغلانندی.

آتامین بوتون وارلیغی گوْیه باغلی ایدی. اکیز اوغلان لارینی اینانلیق لارینا قوربان وئره بیله جک قدر ایمانلی ایدی آتام. او اوزدن بیزی عسگرلییه گوْندردی.

ژیوان یئنه سوروشدو: «دئمه دین شیلرین حرامی لری کیمیدی!»

«دئدیم کی بیز دئین شیلر سن دوشوندویون شیلر دئیل.»

طاهر دیبلقه سی نین<sup>۱</sup> بندینی آچیب، قولاغینین دالیسیندان بیر جیغالا چیخاریب دیلی ایله ایسلادیب داماغینا قویدو. اونون بو ایشینه «او» گلدی تیکیلدی گوْزومون قاباغینا. «او» ائوده درام اوخویاندا مقدس بیر آیین کیمی همیشه بیر گیله جیغالا قولاغینین دالیسینا قویوب، درامی اوخویوب قورتارانان سونرا جیغالانین کاغیدینی دیلی ایله ایسلادیب، آلیشدیراردی.

دئدیم: «یئنه ده مقدس آیین باشلانندی.»

«لاپ ووردون خالین اورتاسینا. کبریت قداغان اولان یئرده من ده مجبورام

توتونون دادینی آلیم دا!»

---

<sup>۱</sup> دیبلقه: عسگرلرین متال بۇرک لری.

طاهرين جيغالا كاغيزدى ايسلاتماغى وپروس كيمي آراشديرما واحدينين بوتون عضولرينه داراشيب. واحدين فرماندهى ده طاهر كيمي جيغالاسيني ايسلاديب داماغينا قويدو.

ژيوان ائشيتمه سين دئيه آستاجا اكيز قارداشيمين قولاغينا ييچيلداديم:  
«طاهر، دئيرم گوره سن «او» دا بوردادى؟»

طاهر جيغالاسيني قولاغينين دالينا گئرى قايتاريب ييچيلدادى: «سوس، گورمورسن بو جاش تورهمه سى بيزه قولاق ياتيرديب؟»

«او» اورتادان يوخ اولاندان برى آتام اونون آدিনি چكهمه يى هاميميزا ياساقلاميشدى. آنامين دا جرأتى يوخ ايدى «او» نون آدিনি چكسين، آتام ائوده اولماياندا بئله «او» دئيردى.

«او» نون آدى ياساق اولان گوندن برى دوشيزه اورلئانين يانماغينين نه ايسيتسينى حس ائديرم نه ده توستوسو گوزومو آجيشديرير. «او» دوشيزه اورلئانين اولمك هيچانينى دا او زويله آپاريب. منه ائله گلير كى، او گئت-گئده بيزدن اوزاقلاشيب، قارداشليغيني بيزدن كسيب، شيليرين حرامى لرى ايله جان قارداشى اولوب.

ژيوان يئنه مشكوك بير لحن ايله سوروشدو: «دئمه دين شيليرين دوشيزه اورلئانى ايله حرامى لرى كيم لردى؟»

ائله او آندا فرمانده تيكانليقدان ايكي متر كنارداكى پاليت آغاجينى ژيوانا گؤستريب دئدى: «ديرمان آغاجا، اوردا پاس وئر. گوزووو جيغيردان آييرما.



بیر قارالتی دا گۆرونسه قراریمیز کیمی خبر وئرسن. قولاق لاریبوی ایتی ساخلا، جواب ائشیتیمک همن آغاجدان ائنیب، تیکانلیغا سوزوله جکسن.»  
ژیوان ایسه سورونگن بیر وارلیق کیمی تیکانلیقدان آغا جا ساری سورونوب، قارالتیسی گۆزوموزدن ایتدی.

طاهرین قولاغینا یاواشجا دئدیم: «آما بو دره نین عجیب آدی وار هااا!  
آلمان هارا، مریوان هارا؟»

«ایتین قودوران یئریندن رمانتیک لرین اؤلن یئرینه جن فاصله سی وار بو شیلرینن او شیلرین.»

«سنجه شیلرین معناسی ندی؟»

«من هاردان بیلیم؟ بونو ژیواندان سوروشمالیسان.»

تیکانلیق ایله قارائلیق آل-آله وئریب، بیزی گۆزلردن گیزله دیر. زامان قارائلیغین باتاقلیغینا باتماقدادیر، منسه اونا فیکیرله شیرم. بو دقیقه هاردا اولدوغونو، نه ایش گۆردویونو، ایناندیغی ایده آل لارینی...

ایده آل لاریندان بیزه چوخ دانیشمازدی. درام اوخویان گون لریمیز زامان اولچوسو ایله اونون یئددی ایل بیزدن فاصله سی وار ایدی، آما ایندیسه اولچولمز فاصله آچیلیب بیز ایله اونون آراسیندا. اونا داریخمیشام. درام اوخویان گون لرین حس لرینه داریخمیشام. یاواشجا پیچیلدا بییرام: «طاهر...»

طاهر ایسه قارائلیقدا باشینی باشیما دایایییر: «منجه ده «او» بوردادی.»

بايقوش سسی قالخیر. ایکیمیز ده سوسوروق. فرمانده پیچیلدا بییر: «طاهر

جواب وئرا! طاهر ايسه بايقوش سسى ايله ايكي دفعه سسه جواب وئيرير. «هوهو هوووو... هوهو هوووو!» بير آز سونرا ژيوان يئنه ده سورونگن بير وارليق كيمي تيكانليغا سوزولوب ياواشجا پيچيلدايير: «گوردوم. اونوموزده كي جيغيرا ساري گليرلر. سايي لاري آلي دن آرتيق اولار.» فرمانده يئنه پيچيلدايير: «نفسيزين ده سسى چيخماسين! بيزي گورمه ليديلر.»

بارماق لاريم كلاشينكوفون اوستونده قورويان كيمي دير. تپه دن ديرناغا كئيميش كيمي يم. وجودومدان يالنيق قولاق لاريم ديرى باشدير. آتامين تاخما ديش لرى، آتامين گوزونون ياش دامجى لارى، او، ژيوانين مشكوك باخان گوزلرى، فرماندهين كاغيدى ايسلانميش جيغالاسى، طاهرين دوربونو، دوشيزه اورلتانين بدنندن سويوندورولموش كيشى پالتارلارى گوزومون قاباغيندا رژه كئچيرلر. بير آن ژيوان آلىنى آزا يوخارى قالديريپ، بيزه سارى گلن قارالتى لارى گوستيرير. فرمانده بارماغىنى دوداغىنا قويور. قارالتى لار تيكانليغا ياخينلاشيرلار. بارماق لاريميز كلاشينكوف لارين تتيكلرينه ياخينلاشير. اوره ييمين دويونتوسونو ائشيديرم، اما نفسيم بوغازي ميم دونه گهرينده ايليشيب قاليب، يوخارى چيخمير. قارالتى لار تيكانليغا ايكي متر قالميش دايانيرلار.

«دئيه سن گوز خطاسى ايميش. بير شئى يوخدو.»

بو سس «كنت دونوا» نين بم سسى ايله دانیشان سسدير. آديم كيمي

امینم۔ یوزہ یوز اونون سسی دیر۔ ایندیجہ اورہ بییم آغزیمدان چیخیب، تیکانلیغا آتیلاجاق۔ بیر آن یئریمدن گوٲورتورولوب، اونون قارالتیسینا ساری قاجماغیم، قارالتی نین باغرینا گیریب، «او» نو قوجاقلاماغیم گلیر، طاهرین قولونو سیلکه له ییب، بو اونون سسی دیر دئمہ بییم گلیر۔ آما او قارالتی دا منیم کیمی کلاشینکوفونو باغرینا سیخیب۔

بو گنجہ شیلر درہ سی نین قارانلیغیندا یالینز ساواش دیلی حاکم دیر۔ قارداشلیق دیلی ایله دانیشماق یاساقدیر۔ بو منیمله اونون ساواشی اولماسا دا، بیر عسگر کیمی ساواشین اورتاسیندا، تیکانلیقدا اونونلا قارشیلشماق مجبوریتینده قالیمیشام۔ ساواشدا یالینز بارماق لار، تئیکلر و گوللہ لرین دانیشماغا حاقی وار۔ اورہ بییم اونا گۆرہ أسیر۔ آز قالیر طاهرہ ساری دۆنوب قولاغینا پیچیلداییم: «ئشیدیرسن؟» آما دینمیرم۔ قورموش وجودومدان یالینز قولاق لاریم دیری باش دیر۔

اونون جوابیندا بیر قادین دئدی: «ئله سه یولا دوام!»  
اونلار اوزاقلانساندان خئیلک سونرا ژویان دئدی: «گۆردوز؟ او قادینی تانیدیز؟»

«او دوشیزہ اورلٹان دئییلدی!» دئدیم۔

طاهر منہ ساری سورونوب، قولونو بوینوما سالیب پیچیلدادی: «سن ده کنت دونوانین ہم سسینی ائشیتدین؟»

من ده آراشدیرما واحدی نین مقدس مراسمینہ قوشولورام۔ طاهرین

دبيلقه سيني قالديريپ، قولاغينين داليسينداكى جىغلانى ايكي ياريا بۇلوب،  
اۆز ياريمي آغزيمين سوبو ايله ايسلاديرام. دونيانين ان آجى جىغلاسينين  
دادى ديل-داماغىما ياييلير...

## گۆیرچین قیزلار

آجان گئنه اؤزوبله دانیشا-دانیشا کوچه قاپیسیندان ایچری گیریپ، قاپینی یاواشجا ایشگیلله ییب دئدی: «گونون جیزلاماسیندا بیر شوشه آلکولا گۆره بو چولاخ قیش لاریمان اوچ ایسقاہ یول گئدیپ، قئیتیمیشم.»

آینده قره نایلون کیسه وار ایدی. من حوض قیراغیندا اوتوروب، اوچ قردش لرین سولاشدی اوینبوردوم. حوضون سویونو آلمنن لپه لندیریردیم. اوچ قردش لر گیجه لیردیلر. گاه ساغا ساری اوزوردولر، گاه سولا. آجانی گۆرچک گئنه آز قالدی قاچیم نایلونون آغزینی آچیب، منه آلدیغی یئمهلر لی ایچیندن گۆتوروم. آما قاچمادیم. بولورم مامان بالاخانین ائیوانیندان باخیب گۆرسه، منه ساواشار. مامان دئییر: «آجان، بیر ده راهب عمی جانان سورا هر کیم سنه یئمهلر وئرسه آما، دئنه ساغ اول، ائویمیزده وار، تزه یئمیشم. سورا گل منه دئی، هر نه ایسته سن اؤزوم آلام.» دئییر: «بئله عادت ائله سن همیشه نفسی بوتون قالارسان.»

من ده آجان کیمی همیشه قاپینی یاواشجا ایشگیلله رم. آما آبانان مامان حیرصله نیب بیر-بیرلرین دئییشنده قاپی لاری برکن چیرپارلار. راهب عمی جان دئییر: «گۆیرچین قیزلارین یووالارینین قاپیسینی دا یاواشجا

ایشگیلله. برکدن چیرپسان گویرچین لرین چورتو پوزولار.»  
 مامان دا مبل اوسته اوزانیب یاتاندا قاپینی یاواشجا ایشگیللهرم کی، چورتو پوزولماسین. بابانی تورپاقدا قویلایاننان بویانا مامان گونون چوخ واختینی مبل اوسته چورت وورور.

آجان قره نایلون ایچیندن آلکول شوشهسینی چیخاردیب، آشپازخانانین آچیق پنجرهسینین هئرهسینه قویوب دئدی: «سنی او ایناندیغین، آل چک بو آلکول اویونوندان آروادا! بسدی. دای اوزوم کسمیر محلهنین داواخاناسیدان آلکول آلیم. آخیرده، سنین بو میکروب اویونووا گوره منیم آدیم پیسه چیخاجاق. آخی، بو ائوده میکروب هاردئیدی؟»

آبا آشپازخانادان چیخیب گلیب حوض قیراغیندا دوروب بالاخانانین ائیوانینا باخدی. مامان ائیواندا دئییلدی. آبا دئدی: «هاردئیدی؟! اصل میکروب ائله بالاخانادا یووالیب. سن بی یول دئنن هاردئیدی!»

آجان دئدی: «استافروالله هاا... دلی شیطان دئیر بیر کیربیت چک، ائوی ده، بالا خانانی دااا... واللّه -بیلاسه داراشماز. سویوخ دیمه دئیل کی بیر آسقیرماغینان داراشسین.»

«سنه دئمهمیشم سسیوی قیس؟ ائله بئله دئیسین کی بو قیزین دا آیاغی یئر آلیر دااا.»

«هر نه دی آنجاخ چاره سی آلکول دئیل. بابام بیغیشدیر بو واسواسیلیغیوی. دای بوننان بئله بیر قطره ده آلکول آلمییاچاغام.»

«سنینخ اولسا دیرسن گلسین اوتوسون منیم بو تپه مده!»

آجان دئدی: «دده سی ائوینن گتیرمییب کی، هر نه بوخدی سنین

اوغلوون شاهکاریدی.»

«کیم بولور؟ بلکه ده او داراشدیریب منیم اوغلوما؟»

آجان دئدی: «أستافروالله هالا، بو آرواد ائله سؤزلر دئییر کی، آز قالیر جین کلمه وورسون.»

راهب عمی جان دامدان بویالایب دئدی: «أبا بسدی. یادیننان چیخدی سنه نه تاپشیرمیشدیم؟»

آبانین دئیینماغینا جین منیم ده کلمه ووردو. دوروب قاچدیم بالاخانادا مامانین یانینا. اونا دئمه دیم آبا دئییر میکروب بالاخانادا یووالایب. یوخسا مامان دوروب آبانان دئییشیب سورا دا قاپی لاری چیرپاچاقدی، سورا دا دیزلرینی قوجاقلایب آغلاياچاقدی.

مامان مبل اوسته اوزانیب، چورت وورور. گویلوم ایستیر مامانی قوجاقلایب دییم، گویرچین قیزلارین ناغیلینی دی! آما قوجاقلامیرام، بیردن چورتو پوزولار. بابانی تورپاقدان قویلاياندان بویانا مامانین قوجاقلاماقدان خوشو گلیمیر. قاباقچا خوشو گلردی. قاباقچا ناهار چاغ لاری ایکی میز باشیمیزی بیر یاسدیغا قویوب، منی قوجاقلایب ناغیل دیپردی. چوخ واخت لار دا من ناغیلا قولاق آسا-آسا یوخلاردیم. آییلاندا یادیمنان چیخاردی هانسی قردش گندر-گلمز یول نان گئتدی. هئس بولمورم قئییتدی یا یوخ!

آبا مریض خانایا گئدیب، قان وئرندن بویانا اونون دا قوجاقلاماقدان پیسی گلیر. هئس من ده خوشوم گلیمیر آبا منی قوجاقلا سین. قاباقلار منی ائله سیخیشدیراردی، ائله بتر یاناغیمدان اؤپردی کی، نم نه واختان آغزینین ایسی یاناغیمدان چکیلمزدی. آما ایندی نه زامان مامانین گوزون اوزاقدان

گۆرور، آل-اوزومو آلکوللو پامبيغينان سيليب، دئير قورخورام سنه ده بولاشا. بابانى تورپاق آلتدا قويلاياندان بويانا هاميميزى مريض خانايا چاغيرديلار. هاميميزدان قان آلدیلار. من ايینه دن قورخوردوم، آما راهب عمى جان دئدى: «کيشى، دؤشوو وئر قاباغا، شستين گئت قولووو توت، قان آلسين لار. کيشى نه قورخار، نه ده آغلار.»

دئديم: «آخى بابانى تورپاغا قويلاياندا آجان دا آغلادى، سن ده. فقط من آغلاماديم. يانى من کيشى اولموشدوم سيز يوخ؟»

راهب عمى جان دئدى: «هه جانيم، سن کيشى تامامسان، بيز يوخ!»  
مامان دئدى: «کيشى لر ده آغلار، اوشاق لار دا آغلار. سنين ده آغلاماгин گلسه آغلا، آما قولووو ترپتمه، قوی قان آلسين لار.»

ايينه قولومو اينجيتدى. آغلاماگيم دا گلدی، آما گنه آغلاماديم. ديش لريمى بير-بيرينه سيخديم. بابانين اوستونه تورپاق تۆکنده ده ديش لريمى بير-بيرينه سيخديم. من ده هر دن بابانين اوستونه تورپاق تۆکن کيمي قاريشقالارين اوستونه تورپاق تۆکرديم. بابانى تورپاغا قويلاياندان بويانا، دای قاريشقالارين ايشيم يوخدى.

دونن راهب عمى جان دئدى: «سن چيخ داما، گؤيرچين قيزلاريميزا بير باش چک، من ده بير آزدان گلیم.»

اؤزو حيطه گئديب، دهليز قاپيسيني ايشگيللهدى. مامان، آبا، آجان، اوچو ده حوض قيراغيندا اوتورموشدولار. حوضداكى اوچ قردش لر هئش بيرينين عينينه دئيلىدى.

اوچ قردش لرى راهب عمى جان منه آليب. اوچو ده بير بويدا، بير رنگده.



راہب عمی جان اؤزو آدلارینی قویوب اوچ قردش لر. دئییر: «بو قیرمیزی بالیق لارین اوچو ده قردشدیلر. بؤیوک قردش، اورتانجیل قردش، کچیک قردش. عینی گویرچین جیلدینه گیرن اوچ باجی لار کیمی بولار دا بالیق جیلدینه گیریلر.»

دئییرم: «راہب عمی جان، آخی بولارین اوچو ده بیر بوی-بوخوندا دیلار، هاردان بللی هانسی بؤیوکدی، هانسی اورتانجیل، هانسی کچیک؟»  
دئییر: «بالیق آدام دئییل کی، بالیق لار دا گویرچین باجی لار کیمی بیر بویدا اولارلار.»

من کی اینانمیرام. تیوق لار دا حیواندی لار. یاخچی؟ بس نییه جوجه لری بؤیودوکجه بوی آتیرلار؟

دئییر: «گئجه لر یاتاندا یورقائین آلتیندا سن ده فیکرلش، من ده فیکرلشیم، بو اوچ قردش لره بیر ناغیل قوشاخ، ناغیلین آخیرینده بالیق جیلدیندن چیخب، گویرچین قیزلارینان توی ائله سین لر.»

یاتاندا اؤز یانیمدا اوچ قردش لره ناغیل قوشورام، آما سحر یوخودان دوراندا گئجه قوشدوغوم ناغیل یادیم گلمیر.

دامدکی گویرچین قیزلارینین یانینا گتتمه دیم. آباغیلین اوتاغینین پرده سیندن گوروردوم مامان آغلا بیر. سسینی ده ائشیدیردیم. باخما کی قولومنان قان چکنده آغلامادیم، مامان آغلا یاندا منیم ده آغلاما غیم گلیر. دئییرم بس راہب عمی جان یئکه لیکده کیشی اولسام دا، مامان آغلا سا گئنه منیم آغلاما غیم توتاجاق.

مامان دئی: «آجان، آبا یا دئنه اوشا غی راحت بورا خسین. اؤزوز بولوسوز کی، فقط قان-قانا ديسه بولا شار. من ده کی گوزوم کیمی مواظبم. ایینه،

پيچاق، قئيچي، حتى چاي ايجديييم استكاني بئله قيفيللي ايشكافا قويورام. ايش گورنده ده الجكلي گورورم. بولورم ايستيكاننان، قاب-قاشيقدان بولاشماز، گئنه ده احتياط ائليرم. آما آبا او قدر بو اوشاغين آل-اوزونو آلکولونان سيله جک کی، آخیر اونو دا اوزونه تاي واسواسی ائله سين.»

آبا آغلايا-آغلايا دئدی: «جان-جییر اوغلوم، گئدر-گلمز یولا گئدن اوغلوم! نيسگیللی اوغلوم!»

راهب عمی جان همیشه دئیر: «ئله گویرچین لر ده همیشه ایکی یولدا اوچورلار، بیری گئدر-گلمز، او بیرسی ده گئدر-قایداری.» دئیر: «گئدر-قایداری یول سو ایچیم کیمی دیر. هوشلو-باشلی گویرچین لر همیشه گئدر-قایداری یولونان اوچوب، گئنه یووالارینا دؤنلر. تکجه بوشا دوشن گویرچین لر گئدر-گلمز یولونان اوچوب، قایتمازلار.» دئیر: «بوشا دوشن گویرچین لرین هئش بیری بیر عاباسییا دیمز.»

بیلیرم بیر عاباسی قديم پولدو. بابامین قديم عاباسی لارینی مامان اوز اوتاغینین ایشکافیندا، آنااس کومپوتونون قوطوسوندا ساخلايیر.

آبا آغلاياندا منیم آغلاماغیم گلیمیر. چرقدینین اوجوینان بورنونون شیرتیغینی سیلیب، سورا گوزلرینی ده سیلنده شیرتیق لار گوزلرینه یاخیلیر. اوندان من اییره نیرم. بیر گون آبا یا دئییه جام اولجه گوزونو سیلسین سورا بورنونو.

مامان گوز یاشینی کاغیذدسمالینان سیلیب دئدی: «دئیرم نانا صاف، سن کی بولوردون گئدر-گلمزه گنده جاخسان، آخی نییه منی ده بولاشدیریردین؟ آدام دا بئله نامرد اولار؟»

آجان دئدی: «قیزیم، اولونون دالیجا دانیشمازلار. ایشدی. قسمته هئش

چارہ یوخذی».

راہب عمی جان دئدی: «مہیہ اؤزونون خبری واریدی؟ تصادف ائلمہسہسیدی کیمین خبری اولاجاق ایدی؟!»

آجان دئدی: «اولماسا قوی بو اوشاق قالسین بوردا، سن گئت آتان گیلده قال. من گیلہم کیمی بو اوشاغا باخارام.»

مامان دئدی: «آجان، باغیشلا ہا، من آتام ائویننن گتیرمہمیشم کی بو زہرماری، سنین اوغلون منہ بولاشدیریب، ایندی ده مجبورسوز منیم داوا-

درمانیمین، اؤزومون، اوشاغیمین خرج-مخارجینی وئرهسیز.»

مامان مبل اوستہ چورت وورور. ائیوانین قاپیسینی آچیب، بویلانیب حیطہ باخیرام. آجان قرہ نایلونو حوضون قیراغینا قویوب، اوتوروب سیگار چکیر. بولورم نایلوندا ہمیشہ کی کیمی ایکی بستہ پاستیل وار، بیری نوشابہ پاستیلی، بیری ده آیی پاستیلی. ہلہ جین کلہمدن چیخمیبیب. گوئیوم پاستیل ایستہمیر.

ائیوانین قاپیسینی یاواشجا ایشگیلیرم. آما مامانین چورتو پوزولور، دوروب اوتورور. گوئیوم ایستیر مامانی قوجاقلاییم. قوجاقلامیرام. یانیندا اوتورب، دئییرم: «منہ گویرچین قیزلارین ناغیلینی دیء دا!»

مامان گوؤلرینی اوووشدورو. گئنه یوخوسو گلیر. دئییر: «گئت راہب عمی جانین دئسین!»

راہب عمی جان ہر گون ایکی دفعہ سحر چاغی ایشہ گئتمہمیش، بیر ده ایشدن گلندن سورا گویرچین قیزلارین قفسی نین قاپیسینی آچیر. گویرچین لر گوئیون گندر-قایددار یولوندا گزیب سورا قفس لرنہ قایدیرلار.

بیر جوت چیل گویرچین راہب عمی جانین چیینیندہ اوتوروب، اونون

اووچوندان ديمدیک-ديمدیک کوروشنه يئبيرلر. حوض قيراغيندا قره نايلون ايچينده قالميش پاستيل لر يادما دوشور. راهب عمی جان دئير: «اووچونو دولدور کوروشنه يين، گل بورا.»

اووچوم دولو کوروشنه يله گنديرم راهب عمی جانا ساری. چيل گؤيرچين لر اونون چيييندن اوچورلار. دئيرم: «بو چيل لر ايکی باجيديلار؟» راهب عمی جان دئير: «بيری اثر ککدی.»

دئيرم: «راهب عمی جان، گوره سن گؤيرچين لر ين ده قانی وار؟» «مه يه قان سيز دا حيوان اولار؟ يئر اوزونده کی بوتون حيوان لار، بيتدن توتدو سير که يه جن، هامیسی نين آدام کیمی داماری دا وار، قانی دا وار. قان اولماسا حيوانين جانی اولماز کی»، دئير.

«راهب عمی جان، گؤيرچين لر ده ناخوشلارلار؟» «آدام کیمی يوخ، آما گؤيرچين لر ين ده اؤزلرينه مخصوص ناخوشلوخ لاری وار دا.»

«گؤيرچين لر ين ده قان-قانا دين ناخوشلوخ لاری اولار؟» راهب عمی جان دئير: «نمنه؟»

دئيرم: «یانی مامانان بابا کیمی قان-قانا ديسه لر ناخوشلوخ لاری بير-بيرينه بولاشار؟»

راهب عمی جانين اووچونداکی کوروشنه لر ييره تۆکور. منی قوجاغينا آليب دئير: «کيشی، اووچونو آچ، بو چيل قيزلار گلسين اووچوندان کوروشنه يئسين لر.»

## من، كۆلگەم و مەھتاب

تموز گىجەسى دىر. مەھتاب گۈيە دولوب، لى پو<sup>۱</sup> ايسە شەرە. جوشغون بىر چاى قىراغىندا كۆكلۈ جانلى بىر آغاجىن آلتىندا ايلەشىب. كندىر ايلە آغاچا دويونلەنمىش لۆتكە بئشىك كىمى سويون اوزرىندە بىرغالانىر. لى پويا ائلە گلير كى آغاج، اونون قارا چوخاسى دىر. بوداق لارى ايسە مەھربان شىح لىر كىمى اونو، كۆلگەسىنى، بىر دە مەھتابى گىجەنىن شرىندىن قورويور.

مەھتاب گۈى اوزونون قارانلىغىنا دولاندا، لى پونون زھنى شەرە دولار. مەھتاب سىز گىجەلر زھنى نىن دادى دا، آغزىنىن دادى كىمى قاچار. مەھتاب اولمايان گىجەلر چوخ سئودىيى قىمىزدان<sup>۲</sup> ھمىشە كى كىمى لذت آلا بىلمز. ھر ھاردا اولور اولسون، شەرىن گۆزۈندە، دوست ائويندە، دوشمان قاباغىندا، داغ باشىندا، چاى قىراغىندا و... قىمىز اونون گىجەلرىندىن اكسىك اولمايان بىر ايچمەلى دىر، ھر گىجە بزم قورماق ايسە اونون دىيشىلمز

---

<sup>۱</sup>مىلادىن سىگىزىنچى يوز اىلىندە باشامىش، چىن شاعرى (۷۶۲-۷۰۱). حىكايەدە يازىلمىش شەرلر،

لى پونون شەرلرىنىن ترجمەسى دىر.

<sup>۲</sup>قىمىز: آت سودو، اسكى زامانلار آت سودونو سرخوشلوق گىتىر بىر ايچمەلى كىمى ايچرىمىش لىر.

عادت لريندندير. هميشه داغار جيغيندا<sup>۱</sup> اوچ ساخسى قده داشييار. بيرينى مهتابا، بيرينى اوزونه، بيرينى كؤلگه سينه. هر گنجه بير آينده اؤز قده، او بيرى آينده ايسه كؤلگه سينين قده، مهتابين قدهنى قيراغا قويوب، اونو اؤزله ينده قده تورپاغا چيله ييب، مهتابى ياد ائلر.

لى پونون عشق طالعيندن علاوه آدى دا گؤى اوزونه دويونله نيپ. آناسى اونو دوغوغو گنجه زهره اولدوزونو يوخودا گوردويو اوچون آغ اولدوز آنلاميندا اولان «پو» سوزونو اونون آدينين سونونا آرتيريب.

لى پونون بير آيرى اؤزليسى ده وار. اونون ياشاديغى ساعاتلار ايكييه بؤلونوب. ايبيرى دؤرد ساعاتين ياريسى هوشيارليقدا، ياريسى ايسه ناهوشيارليقدا كئچر. اونون گوندوز و گنجه دونياسى هئچ بير-بيرينه بنزمز. گوندوزه گؤز آچديغيندا گنجه چاغى ياشاديقلارى بير قوش كيمي پيرررررر ذهنيندن اوچوب گئدر. گوندوزلرى طبيعت سئور بير مسافر كيمي، كنددن كنده، اوبادان اوبايا، ائلدن ائله گزمكده كئچر. قاش قارالينجا، اونون دا خوى-حالى ديشيلر. غير ارادى بير گوج اونو گنجه ياشامينا سارى سوروتلير. دينج بير يئرده اوتراق ائله ييب، اؤز خلوتينده اوچلوك بزمينى قورار. مهتاب گؤيده تاپيلان گنجه لر لى پو ايله آدديم با آدديم دولانار. لى پو آياق كسيب داياناندا، او دا اؤز گؤيونده دايانيب، يئره باخار. هر دنسه اونونلا گيزلن قاچ اوينايار. عشوه لى -عشوه لى بولود آلتينا سوزوب، سونرا قارانليغين اورتاسينا سوزولوب يئر- گؤيه عشوه ساتار.

يئنه بو گنجه لى پونون آلى چاتمير مهتابى تومارلاييب، آلىنى اونون جانينا

<sup>۱</sup>دزیدن تيكيلميش توربا.

گزدیریب، اونوحس ائدیب، اؤزونو اونا حس ائدیرسین. کؤلگهسی هر ندی، پیسندن، یاخجیدان، قیسالیب اوزانسا دا، وفادار بیر ایت کیمی همیشه آرخاسیجا سورونور. آما مهتاب اوچون اونون اورهیینده همیشه بیر نیسگیل وار. قورخور نیسگیلی اورهیینده قالیب، اؤلسون.

لی پو آغاا سؤیکه نیب، گؤزونو مهتابا تیکیب. ذهنی شعردن جوشوب، داشیر، مهتاب ایله دانیشیر.

«بو گئجه باشقا بیر گئجه دیر مهتابیم

اؤلوم دیبلقه کیمی، زره کیمی هیکلیمه آغیرلیق ائدیر...»

مهتاب، سس سیز، توتقون-توتقون، گؤیدن اونا باخیر. کؤلگهسی ایسه، لی پو سایاگی ایکی قدح آل لرینده مهتابا ساری توتوب، شعرین آردینی گؤزله بیر.

«آآآآآآ آی مهتاب،

بیلیرسن سیز لاماغیم نندن دیر؟

های... آی... آآآآآآ آی، مهتاب... مهتابیم!

قورخورام بو گئجه شعریمله قدحیمی یاریمچیلیق بوراخیم...»

مهتاب یئنه ده سس سیز دیر. آسینتی آغاجین بوداق لارینی اسدیریر. شبجلر مهتابین ایشیغیندا چاپین آخیتتیسینی نین موسیقی سسینه نارین-نارین اویناییرلار. لؤتکه اوشاقسیز بیر بئشیک کیمی هله ده سویون اوزرینده ییرقالانیر. قارا چوخا ایسه بئشیک ییرقالانماسینا، موسیقی سسینه، خومارلانیب، آستا-آستا یارپاق لارینین گؤزلی یومولور.

لی پو قیمیز دولو قدح لری کؤلگه سییله برابر ایچیب، مهتابین قدحینی تورپاغا چیله ییب، یئندن قدح لری دولدورور. باشی قیزیشیب. هر دیل ایله، هر سؤز

ايله، باشاردیغی اشاره لر ایله عشقینی، اۆزلمینی مهتابا سؤیله مه یی گلیر.

«مهتابین ایشیغیندا

یاتاقدا یاتماقدان بئزارام

مین قدح قالدیریرام

بلکه آرخییک داریخمالاریمدان جانیمی قورتاریم...»

مهتاب یئنه ده سوسوب. لی پو آغاجین دیبینه بوراخدیغی داغارجیغیندان

بو یوک بیر کاغید چیخاریب، رسیم چکیر. کۆلگه سی بؤیرونه میسیب، اونا

باخیر. مهتاب ایسه ایشیغینی کاغیدین اوزرینه سیزدیریر. رسیمده

کئچی ساققاللی بیر کیشی مهتابی باغرینا باسیب، کۆلگه ایسه آرخادا دایانیب

اونلاری ایزله بیر.

لی پو کاغیدی بیر تابلو کیمی مهتابا ساری توتوب، یئنه ذهنی شعره دولور.

«اوج نفر، اوج همدم

من،

قیمیزا آلی چاتمایان مهتاب

و هر زامان بوشلوغا قالدیران کۆلگه م...»

مهتاب رسیمی گۆرچک بولودلارین آلتینا سوزلور. لی پو، مهتاب رسیمی

خوشلاماییب دئییه دوشونورکن، بولودلارا اوز توتوب اوجا سس ایله دئییر:

«مهتابیم، من سود یولوندا

سینله گۆروشمه یه بئل باغلامیشام

هانسی جسارت ایله یومشاق بیر بولود

قوش لله یی کیمی



سنى مندن آييرا بيلير؟!»

مهتاب بير گؤز قيريمى قدر بولود آلتيندان چيخيب يئر اوزونه گؤز گزديرىب، يئنه بولودلارين آرخاسيندا گؤزدن ايتير. لى پونون گؤزو آخينير، يومولور. گؤيه سارى اوزانميش بير نرديواندان يوخارى قالخير. يوخارى قالخدقجا، مهتاب اوندان اوزاقلاشير. نرديوان بولودلارا چاتيب، لى پو ايسه گؤزونو آچيب، نرديوانين باشيندان يئر دوشور. سينه سى اوزره دوشموش رسيم نارين آسنتى هاواسينا ترپه شير.

لى پو يئنيدن قدح لرى قيميز ايله دولدورماق ايسته ديبينده مهتابى چاي ايچينده اوزه ين گؤرور. سئوينجك قدح لر ايله قيميز كوزه سيني گؤتوروب، دوشر-قالخار حالدا كنديرى آغاجدان آچيب، لؤتكه نى سو ايچينه بوراخيپ، كورك چكه-چكه مهتابا سارى گئدير. كورك لر سوبا توخوندوقجا يئنى بير ملودى سويون موسيقيسینه قاريشير.

«شاپ... شاپ... شاپ... شاپ...»

لى پو سويون ملوديسى ايله هم نوا اولور: «مهتاب... مهتاب... مهتاب...»

چايين اورتاسيندا اوزه ين مهتابين كناريندا كورك لرى ساخلايب، كؤلگه سيني آختارير. كؤلگه سيني گؤرمه بينجه ايكي قدح دولدوروب، قالديرير.

«بو گنجه،

سويون آيدنليغيندا

مهتابى بير قدحه قوناق ائديرم

سونرا بير ليكده دؤنوب، كؤلگه م ايله اوچله شهجه ييك...»  
مهتاب سويون اوزرينده تيره بير. لي پونون عشقى جوشوب، داشيب، مهتابى  
ايسته بير. ايسته بينه غالب گله بيلمير. ايندى كى اونا بو قدر ياخينلاشيب،  
مهتابى اوپوب، نوازش ائتسين دئيه سوييا سارى ايبيلير...  
قارا چو خا يو خودان ديسكينيير. لي پو مهتابى باغرينا باسيب، اوپديوو آن سوييا  
باتيب، سويون آخار ييلا آخير. مهتاب ايسه سويون اوزرينده لؤتكه نين  
قيراغيندا تير-تير تيره بير...

## بوفالو خاللى صنم

«گئنه ده گلدی!» دئدیم. چکیلیب طؤوله نین قارانلیق یئرینده دالیمی  
آخیرا چئوردیم. آخیر دئدییین ده، قدیم آخیرلار. بیر قاپیسی وار ایدی،  
بیرده طاغدان آچیلیمیش بیر باجا. کور اوغونو توولایان باجا، قیرآتین  
قانادینین جوجرمه سینه مانع اولان باجا.

طؤوله نین قارانلیغیندا، یوخونون شیرین چاغیندا، دان، باجادان  
سؤکولوب، طؤوله یه تۆکوردی. باجا بویدا اویناغان ایشیق طؤوله نین  
اورتاسینا اوزاناردی. آیاق اوستونده یاتان، یئره سرهله ن آت ایلخیسین  
هامیسی بیردن یوخودان آییلیب، چؤله آپاریلمازدان اول، یئمین یئییب،  
سویون ایچردی. گئجه لر ده ایلخینین هامیسی باجا بویوندا آی ایشیغینا  
دالیب، یوخویا گئردیلر. ایندیسه اوزون بیر سالونا آچیلیمیش پنجره لرین  
آته یینده کی آخیرلارا یئم تۆکوب، سو قابی یاراشدیریب، دیوارلاری کاشی  
دوزولموش خانا-خانا زاغالارین آدینی طؤوله قویوب لار. گۆیدن آسیلیمیش  
لامپالارین خئیریندن، گئجه-گوندوزو ایتیرمیشیک.

مهترباشى نين آياق لارينين سسى بير يانا، آن باشى قامچينى قيچينا وورماغيندان آجيغيم توتار. اراده سيز ديش لريمى اونا قيچيردارام. اوزومو زور-بيللاهيان ساخاليارام كى، اونون قامچى اوينادان آليني ديشلهمه ييم. مهترباشى سامان اوستونده يثريينده گالوش لاريندان چيخان سسه كي ريخي رام. دئيرم بلكه قارشى طؤوله ده كى ات دال بادل چئزير. مهتر باشى او ات قويروغو ساچيلا يول گئنده، دئير بلكه هانسى اصيل ات قدم<sup>۱</sup> گئدير. بيرى يوخدور اونا دوشوندورسون كى، ات لارين اصلتى قويروغا دئييل، توخومادى.

مهترباشى نين آياق سسيندن علاوه آيرى سس ده گلير. قولاق لاريمى شوشله ديم. يوخ... بيه مين آياق سسى دئييل. او، قارا چكمه لرى ايله سامان اوسته يثريينده، دئيرم بلكه بير قولون<sup>۲</sup> قدم گئدير. اما بو سس، سامان اوستونده دورتولن سيچان سسى كيمي دير.

مهتر باشى ايله يانينداكى گليب، آخيرين قاباغيندا دا يانيب لار. دؤنوب باخميرام. مهترباشى گؤرمك ايسته دييم سون آدميزاددير. ايسته مه سم ده سس لرى هاوادان قولاغيم تؤكولور. بو سسى ايندييه جن ائشيتمه ميشم.

---

<sup>۱</sup>قدم گئتمك: ات لارين بير نوع يثريشى دير. ات قدم گئنده، بير جوت آل-آياغيندان، بير آلى يا آياغى نوبتى يوخاريدا، اوچو يثرده اولار.

<sup>۲</sup>قولون: آلتى آيلغا جان ات بالاسينا قولون دئير لر.

- جل الخالق! بئله ده گۆزلىخ اولار؟ اصیل آت بونا دئیرلر. عۆمرومده بئله خوش دوروشوقلو، گۆزل آت گۆرمه مېشم. گۆنونه بېر باخ!.. ائله بیل آغ-آپ باغ مخمردى.

- گۆزلىیه دئیل دۆهتور جان، پېس اولودى. بېر پانسىونو جانا گتېرىب. ایندییه جن بېر سیلمى نى<sup>۱</sup> اؤزونه يول وئرمه ییب.

- نئچه یاشى وار؟

- جوتلشمه نین لاپ بئله شیرین یاشى، دۆرد یاشى وار. ایكى ایلدى بو پانسىوندا قالیر. هئش کیمه، بییه سینه بئله مینیک وئرمیر.

- جان وئیرر اصلاح نژادا.

- فحل فصیلی مایدان لار سیلمى دن اؤتور زنجیر قیرار، أما بو ایپی قېریخ قویمور بېرى اونا یاخینلاشسین.

- تور کمندى؟

- دۆهتور جان قاریشیق توخومدى.

- پس هیبریددى!<sup>۲</sup>

مهترباشى تمسخرلى بېر لحن ایله دئیر:

---

<sup>۱</sup>سیلمى: آيغير. نر آت.

آت لارین اصیل نژادلارینین اسپرمینی مصنوعی واژنده استریل صورتده ییغیب، بعضی مواد ایله قاریشديریب، سونرا ویال لارا مایع آرت دا (منفی ۸۰ درجه) دونداریب، ساخالارلار. آت لارین فحل فصلی، پی پتله بو اسپرمی مادیان لارین دؤل ائوینه (رحم) تۆكوب، بئله لیکده مادیان لاری مصنوعی صورتده سئچیلیمیش توخوم لاری ایله بارور اندرلر.

- هه، بيهه سى دئيبير پگاز<sup>۱</sup>، بوسفال<sup>۲</sup>، بير ده دورأت-قيراتين ژنى قاريشيب بو ديك باش مايدانين قانينا.

مهترباشى نين تمسخرلى لحن ايله دانيشيق سسى شوشله ديبيم قولاغيمدان ايچرى توكولور. اونون دانيشيق لحنى آينده اويناتدىنى قامچى كيمي دير. هر ايكي سى ده منيم جينيمي كله مه وورور. اونون عادتي دير منيم ايرق-سويومو بيريسينه تانيتديراندا، قامچيني آينده اويناتسين، مسخره سوزلرى ديلينده.

- آما من دئيرم هيتلر ژنى قاريشيب بو مايدانين قانينا دؤهتور جان! ائشيديسن دا دئيرلر هيتلر اوز ايرق-سويونو ساخلاماق اوچون قانيني آدلمان توتدو، حيوانا جان پاي-پولوش ائله ييب؟ دئيرلر آينا دا اوز قانيندان تزريق ائله ييب.

- هيتلرين آتى يوخ ايدى، ايتى وار ايدى.  
مهترباشى «آنان ايتين ائله ده چوخ فرقى يوخدى» دئدى. دؤندوم باخيم گوروم، مهترباشى نين يانينداكى آدام نئجه بيريسى دير. من دؤنمكده، اولار ايكي سى ده طؤوله نين قايسيندان ايچرى كئچديلر.  
اوزومو سايمامزليغا ووردوم. باشيم يوخايدا، طؤوله نين طاغيندان

<sup>۱</sup> يونان ميفولوژيسينده قانادلى بير آتدير، آندرومدانى (زنجيره كى قادين) دنيز قوللارينين آلبندن قورتارماغا چاليشير.

<sup>۲</sup> بوسفال: مقدونيهلى اسكندر ين آتى.

آسلانمیش ایشیغا باخدیم. یادیم گلیمیر بو ایشیق نہ زاماندان بری منیم  
آی، اولدوزوم، گوئشیم اولوب.

مہترباشی آینی بئلمہ، باشیما چکیر. دیش لریمی قیجیردیرام. آز قالیر  
جوفت تپیکله قارینا قویوم. آما قیسا گلیرم. یالیز فیрна چکیب، باشیمی  
آلینین آلتیندان قاقیردیرام. اونون آل چکن گونو یوخدو. بو گونه جن اوندان  
پیس اولزو بیر آدمیزاد گوڑمه میشم. گئنه آینی بویون-بوغازیما چکیر.  
بویونمداکی خالی یانینداکی آداما گوستریر.

- بونو گوڑوسن دؤھتور، اسکندرین ده آتی نین بویوندا بئله بیر خال وار  
ایدی. اونا گوڑه آدینی قویموشدو بوسفال. آنجاق اسکندرین آتی نین خالی  
آغ ایدی، صنمین خالی قره دی. دئیرلر اسکندرین آتی تک شوناس ایدی،  
بییه سیندن باشقا هئش کیمه مینیک وئرمزدی. بو دیک باش میدان اونون  
دا اوزون آغاردیب. ایندییه جن هئچ بیر آت اولماییب منه مینیک  
وئرمه سین. آما دوزون دئسم، بو اییی قیریغا یاخینلاشاممیرام بئله. بییه سی  
ائله بو خالینا آللانیب، ائی بئله پولو یاتیردیب بیر دلی سوو دیک باشدا. دا  
بیلیمیر خالا دئیل، حالادی. آتی مینیب حال ائله مه دین، بئش عاباسییا بئله  
دیمز.

- محشردی. ائله بیل بو فالو باشینی دؤیمه دؤیوب لر بویوندا.

- بییه سی نین دئدیینه گوڑه آناسی دا بو دیک باش کیمی ایمیش. اونا

گۆره اونو مصنوعی صورتده مايالايب لار<sup>۱</sup>. بو دا اونون تۆره مه سیدی.

- چاره سی بودی کی سیلمی نی ده بو طؤوله یه باغلیاسیز.

- هر ایش گۆرموشم دۆهتورجان، فايدا وئرمیر. او طرفدن ده بییه سی

اصرار ائلیر ایندی آت لارین فحل فصلیدی. دئییر بلکه بیز ایشمیزی

یاخچی گۆرموروخ.

مهترباشی بیردن-بیره پیقیلدا ییب گولور. ألینی یانینداکی آدامین

چینییه قویوب دئییر:

- سنه بیر سۆز دئییم دۆهتور، اؤز آرامیزدا قالسین. سیراغا گئجه

بیردن-بیره بیر فیکیر عاغلیما تاخیلدی. سس سیز-صداسیز گتیریب، یاریم

چتول ایچگینی بیر سطیل سویا قاتیب، تۆکدوم بو خان صنمین سو قابینا.

سورا بیر سیلمی نی اؤتوردوم بونون طؤوله سینه. گئجه یاریسی نه اولدی؟!

عرفات محشر!.. بیلیمیرسن بو ایپی قیریخ نئجه دلیه دؤنموشدو. سیلمی نی

طؤوله دن چیخارماسایدیم، سحر لئشینی بیغیشدیرمالییدیم.

آز قالیرام او گئجه نین آجیغینی یالانچی مهترباشی نین قاریندا

چیخاریم. قارنی نین آلتیندان بیر جوت تپیک لاپ حاققیدی. آز قالیر دیل

آچیب اونون یالانینی چیخاردیم، «هانسی سیلمی؟! نه واختدان

مهترباشی نین آدی سیلمی اولوب؟» دئییم. ایندی باشا دوشورم او گئجه

---

<sup>۱</sup> - مصنوعی مايالاما: مصنوعی لقاح



منیم باشیما نه اویون گتیریب. اۆز-اۆزومه دئیردیم گۆره سن منه نه اولوب،  
هئج ائله بیر حالا دوشمه میشدیم!

دئیه سن مهترباشی نین یانینداکی، ائشیتدییی سۆزدن خوشلانماییب.  
قاش لارینی بیغیب گئنه آلینی بئلیمه، باشیما چکیر. آلینه باخیرام. آلینده  
قامچی یوخدور. گۆزلویورم گۆروم بو نوازشین سونو هارا چاتا جاق.  
مهترباشی اونون قولوندان توتوب دئییر:

- دۆهتور جان، گۆزله. بو اییی قیریح ققیلدن تپیک آتار.

او ایسه آلینی باشیمدان بوغازیمداکی خالا ساری چکیر. بوینومداکی  
بوفالو خالیمی نوازش ائله ییب، دئییر:

- هانی آخی؟ بو کی چوخ حمیلدی! گۆزلرینه بیر باخ! پار-پار  
پاریلدا ییر.

- آلانما دۆهتورجان، آلانما. به خود اولوبدی اونا والئه اولوبسان. اونا  
گۆره ده بئله حمیل-حمیل سنه باخیر.

مهتر باشی هله بو گونه جن هوش ائله مه ییب کی من آلینده قامچی  
اولمایان هر هانسی بیر آدمیزادی تپیکله مه رم.

- نه دئییم! بیر دفعه ده بیر سیلمی گۆندرین یانینا، اگر گئنه یول  
وئرمه سه چاره یوخدو، مصنوعی صورتده مایالاندیرارام.

ایکیسی ده طؤوله نین قایسیندان ائشییه چیخیرلار. دؤنوب  
آرخالاریندان باخیرام. مهترباشی قامچینی قیچینا وورا-وورا اوزاقلاشیر.

دئيرم بلکه قارشى طؤولهدهكى آت دال بادال چئزير، بير سيچان سامان  
اوستونده دورتولور...

## آلما فلسفەسى

دئدىم: «قوى حسابلايىم. صرف ائله سه گنداخ»، مات-مات اوزومه باخدى. نم نه عجب هميشه كى كىمى «آز تويوخ يوخودا دارى گورر»، دئمه دى. باشا دوشدوم كى، گئنه گوزو منده، ذهنى اوزاق لاردا سئير ائدير. بللى دئيلدى گئنه ذهنينده نه فلسفەسى توخويور. اونون ذهنى سئيرانگاهى وئجيمه دئيلدى. اوز فيكرىمده قالمىشديم. ايسته ميرديم پوخ يئدومه دوشوم. آخى اتاما بوى دئمىشديم.

«سن وئردىين آيلغى من ايكى گونده تاپارام.»

«أل-قولووو باغليان يوخدى كى اوغلو، بويور تاپ!»، - دئمىشدى اتام. أل-قولومو باغليان يوخ ايدى. قول لاريمى چيرمالاديم، گوزلر يىمى دورد ائله ييب، ايش اعلان لارين زوم ائله ديم.

فلسفه اوخويان فيلسوف دوستوم دئدى: «من ده پايه يم!»

«گونو أللى مين. بير ساعات آرتيق ايشله ساخ، گونو أللى سككىز مين.

آينا دوشر نئچه؟.. اوتوز دنه أللى سككىز اولار... نئچه اولار؟»

دوستوم گئنه ذهنى سئيرانگاهيندايدى. دئيه سن منى ائشيتميردى.

«بو حساب ماشينى منى لاپ كورا بئين ائله ييب ها! قوى بئله

حسابلياخ. اوتوز دنه أللى نئچه اولار؟»

«آى كيو، آينده نين مهندسى سنسن، يا من؟»

«پییبی، من ده دیرم به سن فلسفه توخوما ایشیندهسن، دئمه به منی ائشیدیرسن!»

«سه پنج تا؟ پانزده تا. ایکی صیفر آت اوستونه، اولدو میلیون یاریم، گونده بیر ساعات اضافه... سه هشت تا، بیست و چهار تا، ایبیرمی دوردو ده آت میلیون یاریمین اوستونه، اولار بیر میلیون یئددی یوز قیرخ.»  
اونون حسابلاماسینا گولمه ییم توتدو.

«مش ریحانا دئمیشدیلر نئچه باغ یونجا واریندی، دئمیشدی: اوش باغ، بشش باغ، ایبیرمی بیر باغ... اولان، فلسفه توره مه سی، بو نئجه حسابلاماخی آخی؟ تورکونو قاتیسان فارسینا، فارسینی قاتیسان تورکوبه، فیثاغورث سهلدی، هئچ دکارت دا سنین کیمی حسابلاماگی باشارماز!»  
منیم شوخلوغوم وئجینه ده گلمه دی. هئچ دوداگی دا قاچمادی. جدی بیر قیافه یله دئدی:

«هر کسی از ظنّ خود شد یار من... سن پولونا گوره، من ده فلسفه سینه گوره ایستیروخ ایشلییاخ.»

«اؤزوووو سریمه، فهله لیغین ده فلسفه سی اولار؟!»

پنجره دن اوتاغا اوزانمیش ایری ستون ایچینده کی ایشیقدا هرله نن توز ذره لرینه اشاره ائله ییب دئدی:

«سنین باشین چیخماز. بو معلق ذره لری گوروسن، حتی اولارین دا فلسفه سی وار!»

دانشگاهدان اکیلیب، بیرلیکده فهله لیبه گتدیک. دوستوم منی معلق ذره لر کیمی یئر-گوی آراسینا گوندرب، اوزو جاذبه قانونندان تبعیت ائله ییب، آعاج آلتیندا ایلشدی. «سن دیرماش یوخاری، من آشاغیداکی لاری ییغیم»،- دئدی.

«هانسی فلسفه اساسیندا من یوخاریدا، سن آشاغیدا اولمالیسان؟» -

دئدیم.

«آی کیو، آپارتمان نشینلیخ فلسفه‌سی اساسیندا. من ایندییه‌جن آغاچا چیخمامیشام، قورخورام چیخمامیش کله-باش آیاخ دوشم یئره...»

بو دفعه فلسفه‌سینه باش آیدیم. من اونون کیمی پاستوریزه دئییلدیم. اوشاقلیق‌دان ایشیم آغاچا دیرماشماق ایدی. آتام هله ده حیطیمیزده‌کی، آناسی ایله یاشید اولان توت آغاجینا گۆزبیه‌یی تک یئتیشردی.

وئدره‌نی گۆتوروب، آغاچا دیرماشدیم. وئدره‌نی بوداق‌لارین بیریندن آسلادیم. ایشه باشلامامیش بیر لبنان آلماسی دریب، آغاجین آته‌یینده دایانمیش دوستوما آتدیم. آما، دوستومون چینینه توخونوب، دیسکیندی.

«آی کیو، ناشی نشانچی، آما آتماغیوین واختینا قالیر هله، منه آتما کی، ساخلا واختیندا صاحابینا آتارسان.»

«اوغول بالا، هامی بیلیر قیرمیزی آلمانین فلسفه‌سی ندی. شرط بودی ساری آلمانین فلسفه‌سینی تاپاسان، اوندا سنه فیلسوف‌الفلاسفه دئیرم.»

«قودوخلانما، ایش فلسفه‌سی ایجاب ائلیر کی ایندی ذهنیوی ایشیوه متمرکز ائلییه‌سن، گۆزله آملالار زده‌لنمه‌سین، صادراتی دیلار.»

ایکیمز ده شیرین-شیرین ایشه باشلادیق. او، یئره دوشن‌لری تاختا قوطویا بیغیردی، منسه آغاجین لاپ اوجا بوداغینا دیرماشدیم. هله بیر-ایکی آما درمه‌میشدیم کی، گۆزوم دیوارین اوتایینداکی قونشو باغینا ساتاشدی. خاناباغین قباغینداکی بولقوندا، ویلچر اوستونده توخوما توخویان بیر قیزی ایلشمیش گۆرونجه، ساری آما ائلمده قورویوب، قالدیم. «اولمایا بو پنلوپه منی گۆزلوبور»، - دئدیم. آما سسیمی یالنیز اؤزوم ائتتیدیم.

آغاچ باشيندا ناغيل گوروردوم. قيز او قدر گوزل گورونوردو كي، حاققيم اولماسايدى دا، باخديم. اوزو ده يارپاق لارين داليسيندان لاپ بئله جاناسينر باخديم. گوزلريم بوتون اورقان لاريمى تيترتدى. تاماشا لذتينى تامسينا- تامسينا ايچيمه چكديم...

اوشاقليغيمدا ائشيتدييم ناغيل لاردا، قيزلارين هاميسى نين ساچ لارى هورولموش اولاردى. اينديسه گوردويوم ناغيلا، قيزين قيوريم ساچ لارى دوشونه توكولموشدو. قيز منى گورمزدن، توخومانى ديزى اوسته قويوب، ويلچرين دسته ييندن اسيلميش بالاجا سبدن بير سارى آما چيخارديب، ديشينه چكدى. منيم آغزيم سولاندى. قيز آلى نين داليسى ايله آغزىنى سيليب، گننه آمايا ديش ووردو. آز قالدى آليمده كي آلمانى قيزا سارى آتيب، «من ده بوردايام» - دئيم. آما آليم احساسيمدان فرمان آمادى. عاغليم احساسيم ايله قارشى-قارشىبا دايانميشدى.

گوردويوم ناغيلا والته اولدوم. حساب-كيتاب يادىمدان چيخدى. عمرون بوتون گون لرينى اجرت سيز آغاچ باشيندا اوتوروب، يارپاق لارين آرخاسيندان سئيرانگاهيمدا اولدوغو ناغيلا تاماشا ائده بيلرديم. نه ياخجى آتما بوى دئيمشديم. نه ياخجى كي دوستوم پاستوريزه بويوموشدو، آغاچا چيخماق فوبياسى وار ايدى. يوخسا بئله بير محشر ناغىلى هاردا اوخويا بيلرديم.

«ناشى نيشانچى، وئدرهنى دولدوردون وئر گلسين.»

فلسفه چى دوستومون سسى آز قالدى گوردويوم ناغىلى زدهله سين. منسه وئدرهنى دئييل، ذهنيمى آما فلسفه سييله دولدورموشدوم. اوزو ده ساپ سارى، سولو، شيرين بير آما...

## هر قولاغيمدا بير قيزيل ألما

گيلاس آعاج لارينين شكوفه لرى قيسير قالب، مئويه چئوريلمه سه يدى،  
گوره سن طبيعتين تئلينه توخوناردى؟!

گيلاس سليمانين عشق قايناغى، منيم ايسه اوره ييمين باشينداكى  
قوردلارين قيداسى دير. گوزدن ايراق اوركدن ايراق دئيبلر قديم آدام لار.  
گيلاس فصلى باشلانينجا اوره ييمين باشينداكى قوردلارين قايناشماسى دا  
باشلانار. ائله كى گيلاس فصلى باشا چاتدى، قوردلارين دا قايناشماسى  
آزالار.

يئرسيز زاماندا يئرسيز بير مكاندا اولماق هميشه انسان دوشونجه سيني  
چپ-چئوير ائدر دئيه، دوشونورم. بلكه او گون اوغرونجا حيطه سوزولوب،  
سليمان ايله سونانين سوزلرينه قولاق ياتيرتماسايديم، قوردلار هئچ واخت  
اوره ييمده توخوم سالمازدى. هر سفر او گونه فيكىرلشنده، سانكى او حادثه لر  
ايندى اوز وئرير.

ائو اهلى گون اورتا يوخوسوندا دير. پنجره دن بويلانيب باخيرام. كوچه  
قايسى آچيقدير. سليمان قاينين آستاناسينداكى بيلله ده، قونشو قيزى سونا  
ايسه كوچه ده داينيب، دانيشيرلار. نه دئديكلرينى آنلايا بيلميرم. دئيه سن

سونا يئنه اؤرونو شيتلنديريب، سليمانين بئنيني قازير. اوره ييمين باشينداكى قوردلار قايناشير.

آتام اوتاغين يوخارى باشيندا، آنام ايسه اوتاغين آستاناسيندا ياتيپ. آتام ائله درين يوخويا داليپ خورولدايير كي، قوجاقلاديغي موتككهنى بوش بوراخيب. پنجه لريم اوسته آتامين بوش بوراخديغي موتككهنى گؤتوروب، اؤز ملفه مين آلتينا سوخورام. ديزى-ديزى آناما سارى گئديرم. يوخودا فيسلدايير. عاغليم سونا ايله سليماندا قاليپ، آما آنام بوشقا كيمي قاينين قاباغيني كسيپ. آليمى گؤزونون قاباغيندا يئلله نديريم. گؤرمور. بوتون گوجومو توپلاييب، آتامين اوزريندن دهليزه آتيليرام. حيطه سوزولمه ميش نئچه ثانيه داياييب آنامى گودورم. او ايسه هله ده فيس-فيس فيسلدايير.

گونش قاباغيندا قالميش دمپايى لاريم قيزيشيب، آياق لاريمي پؤشله يير. ايكينجى مرتبه نين دمير پيلله لریندن ائتيب، حوض باشينا قاچيرام. آياغيمي حوضون ايچينه باسیرکن باليق لار ديسکينيب، تلاطومه دوشنده، هؤووشنه ايله ائو صاحبيميزين پنجره سينه سارى دؤنورم. سليمانين آناسيني پنجره داليندا گؤرمه يينجه، اوره ييم دينجه لير.

گيلاس لارى اوووجلاييب، بوشقبا تؤكورم. بئش-اون دقيقه دير سليمان ايشدن گئرى دؤنوب، يورقون جانيني مبل اوسته ساليپ، موبايلىنى قوردالاير. اونون مبل اوسته اوزانميش وجودونا باخيرام. گؤره سن بو وجود منيم وجودوملا بيرلشنده منيمله بيرله شير يوخسا... هر سفرينده دقت ايله اونو ايزله ميشم. اوزونون حالت لرینی، كيپريك لرینين بير-بيرينه قيغلانديغيني، ياريم آچيق آغزیندان چيخان نفس لرینی، هر سفرينده گؤزلى يومولو اولدوغونا گؤره بو شوبهه ايچيمده قاليپ. منيمله بيرلشن بو



وجود منیملہ بیرلہ شیر یوخسا...

سلیمانین گۆزوندن گیزلین جوت گیلاس لارین چۆپلرینی بیر-بیریندن آبییرام. گیلاس لار دیب لرینه چۆپ سوخولموش شارلارا بنزه بییرلر. بشقابی میز اوزرینه قویماق همن سلیمان قالخیب ایلہ شیر. دونن گیلاس لارین چۆپلرینی دیدن قوپارتدیغمی گۆرونجه دئدی: «بو ندی؟ اولمویا یئمک عوضینه گیلاس لاری شار کیمی اوتاغین بو باشیندان او باشینا هئلہ ده جه بییک؟! گیلاسین چۆبونو قوپارتماقدا سندن چیخدی؟»

جوت گیلاس لاری تکله دییمه یئنہ اعتراض ائده جک دئیہ هؤووشنہم وار. او ایسه اوزومه باخمادان دینمز دانیشماز تکله دییم گیلاس لاری جوت-جوت گۆتورب، آلینی یوخاری آپاریب، اوشاق کیمی آغزینا ساری ساللایب، یئیپ، چرده ک لرینی بشقابا پوفله بییر. سلیمان گیلاسدان علاوه هئج بیر مئیوه نی او طرزده یئمز.

حوضون سویو آیاق لاریمی سرینله تسه ده، دمپایی لاریم هله ده ایستی دیر. سلیمان قاپنین آستاناسینداکی پیله ده دایانیب، آرخاسی حیطه ساریدیر. سونا منی گۆرمه سین دئیہ دمپایی لاریمی چیخاردیب، آیاق یالین دیوارا سینیب اونورونجا قاپیا ساری گئدیب، اونلاری ایزلرکن دانیشیق لارینا قولاق آسیرام.

«هر سیرغا عوضینه بیر شار.»

«خئیرم، قبول دئی، مه یه گیلاسین جوتو نئچه دی کی؟»

«یاخچی دا، اوندا بیر جوت سیرغا عوضینه بیر شار، أمما بیر شرطنن، ساری اؤزوم سئجه جه یم.»

سونا قولاغینی سلیمانین آغزینا ساری ساللا بییر. او ایسه آغزینی آچیب آعاج

بوداغيندان گيلاس يئين كيمي سونانين قولاغيندان سالانميش چؤهره يي  
گيلاس سيرغاسيني يئيب، چره دك لريني قاينين آستاناسينداكي پيلله يه  
پوفله بير. آغزيني سونانين او بيرى قولاغينا آپاراندا سونا دالى چكيليير.  
اوره بيمده قايناشان قوردلارين بوينوزلارى اوره بيمين نم هاراسينا باتير...

«اولماز، اول شارى وئر سورا بو بيرى سيرغانى يئ.»

«والله جىغالليخ ائله مرم.»

«يووو... اول شارى وئر سورا...»

سليمان اوووج لاريني آچير.

«من او يئكه شارى ايستيرم.»

«خئيرم، او زقه شاردى، عمى جانيم بولبرينگدن چينخارديب.»

«اوندا بس او ياشيل شارى وئر.»

«يوخ، ياشيلى دا وئرهمرم.»

«گوردون كى جىغالليق ائليس.»

«خئيرم، جىغالليق ائله ميرم كى، ياشيل شار سنين گؤز لريوين رنگيندهدى

اونا گوره وئرهمرم. اونو هئش كيمه وئرهم كى.»

سونا گولور.

«اوندا بس او گيلاس رنگينده كى شارى وئر.»

سونا شارى آليب، يئنه قولاغيني سليمانين آغزينا سارى ساللاير...

سليمان تك گيلاس لارى جوتله ييب يئنده اوزده سايماز يانا ياناشسام دا

اوره بيمين باشينداكى قوردلار بوينوزلاريني ايتليديب، اوره بيمين نم هاراسينا

باتير. گيلاس فصلى باشا چاتسايدى قوردلارين بوينوزلارى دا كوته لردى.

قوردلار منيم ضعيف داماريمدير. انا دميشكن، عاغيللى قادين لار ضعيف

دامارلارینی ائولندیکلری کیشی یه گؤستمزله. سلیمانین ذهنینی یایندیرماغا چالیشیب، گیلاس یئمک لذتینه مانع یارادیم دئییه، تلویزیون سسینی اوجالدیرام. خبر کانالی افغانستاندا انتحاری حادثه ده اؤلن لرین سایبسینی سایبرکن انتحار وسیله سینی گؤستیریر. بو سفر اولوم ابزاری انتحاری قورشاق<sup>۱</sup> دئییل، بو سفر انسان لارین اولوم ابزاری بیر آمبولانس ایمیش. انسان لاری اولومدن قورتاران ابزار انسان لارین اولومونه سبب اولدوغو یئنه ذهنیمی قاریشديریر.

عشق، انسان لاری یاشادان انتزاعی بیر ابزار اولسا دا، منی یاشاتمیر، منی ایچیمدن یئیر. سلیمان انتحاری اولوم خبرینی ائشیتمه میس کیمی آغزینی گؤیه آچیب، بیر جوت چؤهره یی گیلاسی آغزینا ساللايریر. اونون گیلاس توتان آینه باخیرام. گوره سن گیلاس لاری اونون آغزینا ساللایان سلیمانین آلی دیر یوخسا سونانین قولاغی؟ گیلاس لاری اونون آلیندن آلیب، دیوارا چیرپماغیم گلیر. سلیمان چؤپ ایله چردک دولو بشقابی میز اوسته قایتاریر. ندنسه اوزومو بشقابا توپورولموش چردک ل کیمی حس ائدیرم.

سونا دئییر: «صباح گئنه سنه سیرغا گتیریم؟»  
ایکیسی ده گولوشورلر. قوردلار اوره بیمن باشیما قالخیر. صباحی دؤزه بیلرم. ائویمیزه ساری قاچیرام. یالین آیق لاریم دمیر بیله لرین ایستیسیندن پؤشله نیر. تلم تله سیک یخچالی آچیب، سوما خبالانداکی گیلانارلاری آلت اوست ائله ییب، سیرغا آختاریرام. آنام اوتاغین آستاناسیندا دهلیزه ساری

<sup>۱</sup> قورشاق: کمر بند.

أييلب يوخولو يوخولو دئيير: «جانين يانماسين قيز! بئش ديقه ديش دورانميسان. اوردا نه قوتدالانيسان آخي!»

آنام يئنه باشيني باليش اوسته قويوب، گؤزونو يومور. گيلانار سيرغالاريمي قولاق لاريمدان ساللاييب، حيط ائيريم. سليمان حوض قيراغيندا اوتوروب، سويو لپه لنديرير. باليق لار يئنه تلاطمه دوشوب لر. دمپايي لاريمي گئييرم. سليمان سيرغالاريمي گؤرسون دئيه اونون قارشيسيندا اوتوروب، باشيمي دبرديرم. او ايسه منه باخمير. باليق لار لا اويناير.

دئييرم: «آتام دئيير كي قيزلار شار اويناتمازلار.»  
«دوز دئيير دا، قيزلار قولچاق اوينادار، ائوجيك قورار.»  
«اونا گؤره من ده هئچ شاردان خوشوم گلمز.»  
«كي نه اولسون؟»

«هئش زاد، دئييرم ياني گيلانار يئيرسن؟»  
«من گيلانار سئومه رم، تورش اولار.» سليمان باشيني بئله قالديرمير سيرغالاريمي گؤرسون.

سيرغالاريمي چيخاريب، اونون گؤزونون قاباغيندا يئيرم. اوتدوغوم چرده كلر اوره ييمين باشيندا كي قوردلارا قاريشيب، اوره ييمي دلن كيميديرلر.

يخچالدان بير چنگه گيلانار گؤتورب، اووجوم ايچينده دوزلاييب چؤپ لريني آيلمه قوپارديب، يئيرم. گيلانار چرده كلريني اودماقدان خوشوم گلير. گيلانار چرده ييني اودماق، ضعيف داماريمي اودماق كيميدير. سليمان گؤزو يومولو مبل اوسته اوزانيب مورگوله نير. گؤره سن بو آن اونون بير-بيرينه قيغيلانميش كيپريك لرينين آلتيندا كي م گزير؟ بو آن اونون بئيني كي م ايله

دولودور؟ اونونلا بیر ائوی، بیر یاسدیغی پایلاشان من، یوخسا...  
اونون کیپرک لرینین قیفیلینی آچیب آلتینی گۆرمه ییم گلیر. اونون بئینده  
گزیب، هر آن کیمی دوشوندویونو بیلمه ییم گلیر.  
میل اوسته اوزانمیش نارین-نارین خورولدایان او کیشی قالیلی بدنه  
باخیرام، آل لرینی سینه سینه چارپازلامیش قول لار، بوغاز دریمی نین آلتیندا  
دیک قالمیش سوموک کیمی سیب آدم، گۆره سن سلیمانین بوغازیندا  
سوموک کیمی ایلشیب قالمیش او سیب آدم منم یوخسا....  
یقین کی، بیر آن اؤنجه یئدییی او گیللاس لارین دادی هله ده بیغ آلتیندا  
ایتمیش دیل-دوداغیندا قالب. سلیمانین بدینه بئله شوبهه له نیرم.  
وجودوموز بیرلشدییی آن منیمله اولمادیغینی حس ائتمیشم. من نئجه؟  
وجودوموز بیرلشدییینده اونونلا اولموشام، یوخسا اؤزومو اونودوب، سونانین  
ایزینی اونون حس لرینده آختاریب، اوره ییمین باشینداکی قوردلاریمی  
قیدالاندیرمیشام!

سلیمانین یوخوسو درینله شیب، خورولدا بیر. منسه یئنی یئتمه چاغ لاریما  
دؤنمه ییم گلیر. آستاجا آشپازخانایا گئدیب، اؤزل اشیا لاریمی ساخلادیغیم  
چای جعبه سینی کابینتده بشقاب لارین دالیسیندان گۆتوروب، قاپاغینی آچیب  
یئرّه بوشالديرام. بیرجوت قاشی دوشموش تئل سانجاغی، آتام بو  
سانجاقلاری آلدیغی گون اونلاری تئلیمه سانجیب، سونایا یاندی-قیندی  
وئرمیشدیم. داییم تورکیه دن هدیه گتیردییی گوش عینکیمین سینق آغ  
چرچیوه سی، هدیه نی آلدیغیم گون اونو گۆزومه تاخماغا بئله تامارزی قالدیم.

عینکی گۆزومه تاخدیغیم آن گوش بیردن-بیره باتیر. گونون جیزلما چاغی  
ایکیندی چاغینا چئوریلیر. سئوینجک کوچه یه قاچیرام. سلیمان شار اویونو

اوچون ميسمار ايله يئرده بالاچا چوخورلار قازير. سونا ايسه قايي لارينين قاباغيندا سگيده اوتوروب، عينكى گؤزومده گؤروركن يئرندن قالخير.

«وئريسَن من ده بير دفة تاخيم؟»

«داييم توركيه دن گتيريب، وئرميرم.»

سليمان چوخور قازيركن بيزيم تارتيشماميزا باخير.

«يئميرم كي، بير دفة گؤزومه تاخاجام قئيترم دا...»

سليمان چوخور قازماغى ياريدا بوراخيب، ميسمارى يئره اتير.

«وئريسَن من بير دفة تاخيم؟»

سليمان گيلانار سيرغالاريمي يئمه سه ده عينكىمي اونا وئره رم.

سليمان عينكى گؤزونه تاخيب يئر گؤيه باخيب، آل لرينى آچيب دولانباچ

دولانير. اونون ايشينه گولورم. بير آندا عينكى اؤز گؤزوندن گؤتوروب،

سونانين گؤزونه تاخير.

«تاخ بي، ائله بي كي هر يئر كؤلگه اولور.»

قوردلار اوره ييمي دئشير. چنگه مى ساليрам عينكى سونانين گؤزوندن

گؤتوروم. سليمان ايسه منه مانع اولسون دئيه آليمدن ياپيشير.

«يئميه جك كي، باخير وئرسين دا...»

عينك آليمدن يئره دوشوب شيشه لرى پرن پرن اولوب چرچيوه سى سينير.

قيوير-زيويرين آلتيندا ياشيل بير شار منه گؤز آغاردير. بو شارى

اوغورلاديغيم گون اوره ييمين باشينداكى قوردلارين اوره يى سرينله دى.

سونايلا سليماندان كوسموشم. تك باشيما پالاز ساليب قاييميزين قاباغيندا

اوتوروب، كيهان بچه ها مجله سى اوخويورام. سونا سگيده اوتوروب، سليمانا

باخیر۔ سلیمان ایسہ تورپاق اوستہ دیزہ چوکوب، شار اوینادیر، شارلاری چوخورلارا ساری هئله دیر. شارلار بیر-بیرینه توخونوب چیقیلدایاندا گۆز آلتی اونا باخیب، یئنه مجله می اوخویورام. سلیمان بیردن-بیره قالخب شارلاری چوخورلاردان یغیب، سونایا وئریر.

«گل دور آستانادا شارلاری ساخلا من قاچیم ایشه مه ییمی ائله ییم، گلیم.»  
سلیمان ایله سونا قایدان ایچری کئچرکن چوخورلارین بیرینده یاشیل بیر شارا گۆزوم ساتاشیر. اوره ییمین باشینداکی قوردلار تلاطومه دوشور. جلد اوزانیب شاری گۆتوروب، اووجومدا برک-برک سیخیرام. سلیمان توالندن قایدیب، شارلاری سونادان آلیرکن دئییر: «به یاشیل شاریم هانی؟ سن گۆتدون؟»

سونا گۆزونون لیلیینی آخیدیر.

«یالان دئمه. سن اوغورلادین.»

سونا آناسی نین جانینا آند ایچیر. اونلار تارتیشیرکن من پالازیمی ییغیشدیریب، ائوه گئدیرم. اوره ییمین باشینداکی قوردلارین توی بایرامی دیر.

بیر آن پیشخوانین بؤیروندن آشپازخانایا گیرن سلیمانی گۆروب، دیسکینیرم. در حال اووجومو یومورام. اووجومداکی یاشیل شاری گۆرمه سین دئه اوره ییمده اینانديغیما یالواریرام.

«او شار سنده نئینیر؟»

ایل لر سونرا اوغورلوغوم آی ایشیغینا چیخسا دا، دینمیرم.

«اونو سن اوغورلامیشدین؟»

یئنه دینمیرم. دانیشسام ضعیف داماریمی آچیق-آیدین سلیمانا گۆستریش

اولارام. اناام دئميشكن عاغيللى قادين لار ضعيف دامارلاريني ائولنديكلرى  
كيشيه گؤستمزله.

آپارتمان قاپيسى ايشگيلله نير. سليمانين عادتى دير ناراحات اولدوغوندا ائودن  
ايشيه چيخيب، هاواسى ديشيلندن سورا گئرى دؤنسون.

آل-قولوم سوستاليب. گؤيلوم دوزلو گيلانار ايسته بير. قيوير-زيويريمي چاي  
جعبه سينه قايتاريرام. ياشيل شار اووجومدا قالير. سليمان گئرى دؤندويونده  
اوناهه دئمه لييم؟

يخچالدا گيلانار گؤتوروركن گؤزوم گولابى نوبار آلمالارا ساتاشاندا، يئنه  
سيب آدم ناغيليني خاطرلاييرام. گوره سن سليمانين بوغازيندا سوموك  
كىمي ايليشيب قالميش او آما، سونادير يوخسا هر بيريميزين بير ديليمي  
اونون بوغازيندا ايليشيب قاليب؟!

شارى سليمانين كامپوترينين كنارينا بوراخيب، ايكى جوت آلمانين  
چؤپلرينه ساپ دويونله ييب، سيرغا كيمي قولاق لاريمدان آسلاييرام.  
بشقاب دولو دوزلو گيلانالارى يئيب، چردكلرينى اوداركن سليمانين گئرى  
دؤنمه ييني گؤزله ييرم...